


MACOA

TATA JESOSO BIYO

ZEHUITA PO LACUA CANA



El Evangelio segun

SAN MARCOS

MACOA TATA JESOSO BIYO ZEHUITA PO LACUA CANA

El Evangelio segun San Marcos

Versión en Araona

Traducido por
EL INSTITUTO LINGUISTICO DE VERANO

Publicado por
LA LIGA BIBLICA MUNDIAL DEL HOGAR

1975

100

MACOA
TATA JESOSO BIYO
ZEHUITA PO LACUA CANA

Capitolo 1

1 Tadicatapoa bacue dea, Tata Jesoso biyo po lacua cana dipa epo. 2 Tata Jesoso eohuao pipomahue tsio, shipa poisa tata Isaia neti epo. Huada Tadicatapoa jejeme shipa cuaenetilelajai. Huada Tadicatapoa jejeme jilica cuichao zehuita. Tadicatapoa jejeme mipa epo:

Quia bacue dea, becata yama midya
pa-ilo, eohuao netica po cana
pabashati pojo.

Bale, quima eiloi, tata Joana, eshoi
pa-ilo.

Tata Joanaja pacuaeanati eshoi.

3 Lele cana tsaai pojojo tata Joanaja
ecuicha cana dipa pacuaeibo:

"Tata Cuichacatapo, peasocata po
pacuaiñaibo. Masahue ai alelajai po
cana da ahueyaiquibahue potame sahua.
Dyamo daehuecata potaibome sahua.

Tata Cuichacatapo jajemiquibo meaque."

4 Apamo mala potso dada, Tadicatapoa
eiloi, tata Joana datsimehue dia ea, atsono
cuaeta bime dipa. Lele cana pijama pojojo,
huada shipa cuaedeahuodi ea, ecuicha cana ajai
papoibo pojo. Huada dipa cuaeme ea:

--Ecuicha canaja masahue ai ea po cana Tadicatapomo cuaecuaeibojomo, Tadicatapoa joda azalo cana eiboetamehuiquibo. Yama joda cana huidyiamepasibo.



5 Apamo ecuicha cana tata Joana najo noatihuodi epo. Jodea eohua cana, lele Jelosalene cana, tata Joana najo popejajopeibo. Joda canaja masahue poi posha po cana Tadicatapomo cuaecuaeibojo, tata Joanaja huidyameta, mano Jodana cuichao.

6 Tata Joana camelo iña masha jaibaime epo datsio. Huaeni biqui metse eijiqui epo, nibojo. Huada, doolopo tsai batahue diji, huaja diji pehue epo. 7 Tata Joanaja dipa cuaeme ahuodi:

--Ema ehui cuaiñaibo, bale peada cuichacata po belicata papobeibo isha. Da bale

peasocata lacua. Ema hua eiloi poi jaipi poi pipoma. 8 Yamamo micana huidyame bishapo pehue meani, Tadicatapo poi. Huadamo bale hua shama ajaicata po patitacata pomo.

*Tata Joanaja Jesoso
huidyame ea po biyo*

9 Potso Tata Jesoso cuaiñaibo. Nazale lele jeneti pojaenatitso tata Joana bacuaiñaibo. Nazale lele Calilea eohua eja. Tata Joanaja Jesoso huidyameibo, mano Jodana cuichao. 10 Tata Jesoso potsoani tsiohue, Tadicatapoa



baepa huapahuikitani, Jesosoa eba. Da bisha Tadicatapoa shama poboteiboani, huai batahue, jodahue cuichao eaniquini, Jesosoa eba.

11 Datsio Tadicatapoamo, hua lele jeneti, shipaecata cuaeme ea:

--Midya quima bacue deacata po. Midya batso nime ajai ema.

*Satanasa shilia
Jesoso masahue mepotia ajae po biyo*

12 Dipa atao, Tadicatapoa shamaja Jesoso ponamehuiquitaibo, ecuicha cana tsaai pojojo, huaeni cana asabe po neti pojojo. 13 Peadahue badi lijihue Tata Jesoso do poshao. Satanasaja Jesoso masahue mepotia ahuodi posahua. Tata Jesoso bale ajaicata netime pohue. Tadicatapoa hua eiloi shama cana bechomehuiquita, Tata Jesoso paatsahuata pojo.

*Tata canaja Jesoso
bocuetsaneibo ea po biyo*

14 Becata tata Jelodea tata Joana iziamahue ashatao, Tata Jesoso Calilea eohuao hua cuaiñaticana. Do cuaiñatitso, Tata Jesosoa Tadicatapoa jejeme cana ajailacua po shipa cuaede. 15 Jesoso dipa mimi:

--Behuehue Tadicatapo eametanihuecata papo. Miqueda esi alelashili cana iboetataibome sahua.

Tadicatapoa jejeme cana pehue jemiquicaibome sahua.

16 Becata Calilea bai laiijiye poyoame tsio, huada tata Simono, tata Adese bata. Tata Adese tata Simonoa mamazao epo. Huatseada tojo bado jalidya po ena tipao huanaiboani, jae panobi pojo.



17 --Mepobeaque. Ema metsea bocuetame, --Tata Jesosa cuaetani--. Metseada jae jemiji polelajai. Behuehue bale ema mebocuenetiquiboque. Izedea pa ya metse posani, peisha po ecuicha cana pamejemi quibo pojo, Tadicatapoa poi.

18 Dipa cuaetaibojo, huatseada tojo cana eishashahuiñaibo. Jesoso bocueibo. 19 Bai laijiye jadeatibo isha. Ai aocueolimi poyoa tsio, tata Jacobo, tata Joana tso baneti. Hua tadi, tata Zebedeo nae, epo. Canahua meo eani epo, tojo cana eajaichataiboani.

20 Datsiohuecata Tata Jesosoa jejeiquibo. Ataibojo, tata Jacoboa, tata Joanaja hua tadi eatsahuai cana nae canahua meo meiyahuiquishahuiñaibo. Tata Jesoso bocueibo.

*Jatosaemetiji po
shama biyo*

21 Joda cana Capenoma leleo cuaiñatibo. Janahuaibolelajai tseifneo Tata Jesoso Tadicatapo nae mimilelajai po etaezo nobi. Nobitso, huada eanicha po cana eizedeibo ea. 22 Joda tsabajatso, eanicha po cana eizepe epo. Peisha po ai izedeamei cana dia potso eizepe pipoma. Tata Jesoso bale dia potso izei masha. Da bale peasocata masha. 23 Datsio jatosaemetiji po shama dojoi po tata jodo nobibo. 24 Joda tata do-ejecata mimime epo:

--¿Cuipa jabatitso tso mi pobeani? ¿Cuama maesa paapeibo ezae sha mi pobeani? Tadicatapoa bacue dea lacua, midyamo. Dipa ya midya bamehue.

25 Tata Jesosoa bale joda masahue po shama shehuihuiquitaiqui.

--Tsiani poshaque. Joda tata midyojo pifetima poque. Meiyahuiquiboque. --Tata Jesosoa ea.

26 Shamaja jejajaemehuiquitso, tsitsia. Tsitsia potso meiyahuiqui. 27 Daocua cuahue ecuicha cana nimetiobape epo. Cuipatso jaatihuodi epo.

--¿Japotso ja dipa damo? Huadamo shacua po cana izedeametani. Eilotanio. Jatosaemetiji po shama meiyamehuiquibohuodi.

28 Atsonolimi potso joda dipa po poiboani po biyo, Calilea cana daocua cuajahue jacuaetihuodi epo.

--Tata Jesoso cuichacata --jacuaetime pohnodi epo.

29 Daeneti pojaenatitso, Tata Jesoso, tata Simono, tata Adese, huatseada etaezo nobijaiña. Tata Joana, tata Jacobo dohue isha nobi.

Boada batani po mama biyo

30 Datsio tata Simonoa huanea huadi, boada batini batso eja epo. Behuehue etaezo eani po canaja Jesoso ecuae:

--Huadamo boada batani.

31 Joda eja po pejo Tata Jesoso nobijajo. Meatsao iñatso eishatsoahuiquibo ea. Ataibojo, huaca poanaibo. Datsio joda mamaja jana tipehuiquibo. 32 Zeti olotiti tsio, joda leleo

neti po canaja ai neda bai po cana Tata Jesoso najo docuaiñaibo. Masahue po shama dojoi po cana dipahue Jesoso najo dojocuaiñatani epo.

33 Daocua cuahue joda leleo neti po cana dohuodi tsecueanaesha epo. 34 Apamo ai neda bai po cana Tata Jesosoa jaihue masha mepetaiba. Dipahue, huada apamo tata midyojo bade po masahue po shama cana poanamepehuiquitaiba. Joda shama canaja, Jesoso, Tadicatapoa bacue dea dipa bamehue. Dipa batso, Tata Jesosoa:
--Pimimima mepoque --ea.

*Calilea eohua
cuaebaletani po biyo*

35 Hueno, huena cuanao Tata Jesoso eanitsoashahuñaibo. Huetianaibotso, ecuicha cana tsaai po beneje potibo. Jodo Tadicatapo nae mimijajobo. 36 Becata, tata Simono, jodo po cana nae Tata Jesoso tsabale.

37 Banetibotso,

--Daocua cuajahue mi tsatani --ea.

38 Bale, Jesosoa cuaetaiqui:

--Cuada shipa jadeati isha, peisha po lele cana babaleti. Peisha po leleo po cana yama Tadicatapoa jejeme pacuaeanati. Dipa paa ezae ema pobeasana.

39 Da atso, daocua cuahue Calilea eohua pobale. Tadi nae mimilelajai po etae cana meo

Jesosa izedeahuodi ea, masahue po shama cana meiyamepehuiquibohuodi ea.

*Biqui ihuicuaiñajaecata po
tata biyo*

40 Dipa babaleani tsio, peada tataja Tata Jesoso bacuaiñati. Joda tataja cuicha jaidya pipoma epo. Biqui jepe ihuicuaiñajaecata epo. Joda tata eanibote, Jesoso botseo. Dipa potso huada dipa eajaiña:



--Midya bale ai izemeibo masha. Bale
¿ema tso mi izemeibojae quepotso?

41 Tata Jesoso neda mepoanaiqui batso,
meatsa metse eitsobaibo. Eitsobani tsio, Tata
Jesoso mimi:

--Yama mi izemeibojae. Behuehue
meizemeibo.

42 Dipa cuaeme eani mepaihue, joda tata
jaihue masha poanaibo. 43 Tata Jesosoa,
jado-ejetitso metse, eilohuiquibo. 44 Eshoi
bale Tata Jesosoa dipa cuaeibo:

--Ai se mo ai picuaema aque. Tadicatapo
nae mimiji po cana bale banaticame sahua.
Miqueda cuicha cuaeanaticame sahua. Miqueda
ai tibomane joda cana pehue. Tata Moise
tsonoda dipa mepoa ea, dipahuecata aiboque.
Dipa atame sahua, ecuicha canaja midya idya
isha jaihue masha bamehuehuodi paata pojo.

45 Ponaibotso, joda dipa batso, da biyo
cuaebaletani bime. Dipa poani batso, Tata
Jesoso leleo cana nobijae pipoma, ecuicha
canaja batani tsio. Ma bene lele janabacua
bale Jesoso neti epo. Bale apamo ecuicha
canaja Tata Jesoso bacuaiñati. Hue cuaiña,
hue cuaiña, hue cuaiña, bacuaiñati.

Capitolo 2

*Jesosa mosojo cana
ahuishi jametiji po biyo*

1 Betahue tseifeme potso, Tata Jesoso noahue cuaiñatibo isha Capenoma leleo. Joda leleo neti po canaja Jesoso hua etaezo neti tsabajataiqui. 2 Da tsabajatso, apamo joda canaja Jesoso bacuaiñati. Apamo dohuodi epo. Etaemo jejeape epo. ¿Jepemo queje bisha ja



nobi? Tsecueanaemo diloa epo. Jodo etae meo
Jesosa Tadicatapo jejeme cuaetani epo.

3 Datsio peisha po ecuicha cana cuaiñatibo
isha. Joda canaja huaezacua po ijiji ijijicata
po dobea. Cuatolo tata cana joda dobea.

4 Tata Jesoso pejuhucata pojae, bale ecuicha
cana do maiyaneti batso tsecueanaeye nobitoa
pipoma. ¿Queje bisha ja etse nobi? Datsio joda
canaja etae biyae dotsoamehuiquibo. Huanai liji
huapahuiquibo, Jesoso neti po biyae. Lala
aibotso, ja pehue po huanabotea, ejaiyo.

5 Joda cana Jesosa eatsahuatani jabatimehue
poani baibotso, Jesosa ja pehue po cuaetaiqui:

--Yama mique azalo po cana tso
jihuiquipeiquiba. Mique mosojo tso ahuishi
mehuiquitiba.

6 Beta ai izedeamei tata jodo eani epo.
Joda cana dipa jacuaetini epo:

7 --¿Japo ja dia poanicata? Dipa mimimane
pipoma potame sahua. Huadamo Tadicatapo dali
bishapo pehue. Tadicatapoamo pehue mosojo
ahuishi aibotoa.

8 Da cana dipa tsiba ahuodi, Tata Jesosa
dipa bamehue. Batso Jesosa joda cana
bicuaebajataiqui:

--¿Cuipa pojo tso micana dipa nimebahuodi?

9 ¿Jique jejeme popo bale ja jaidya masha yama
ja pehue po cuaeme aibo: "Yama mique azalo po

cana tso jihuiquipeiquiba," poopo,
 "Netianaiboque, mique ejai jemitsoaiboque,
 ajeiboque," poopo? ¿Jique apo atso bale jaidya
 masha? 10 Tadicatapoa ema ilota. Ema tata poi
 dya isha. Bale eohuao neti tsio dipahue yamamo
 mosojo cana ahuisi jametiji, Tadicatapomo
 batahue.



Datsio, joda canaja
 dipa bamehue papo pojo,
 Tata Jesosoa ejahue po
 cuaeibo:

11 --Yama mi cuaesani,
 netianaiboque, mique ejai
 jemitsoaiboque, pojajoboque.
 12 Dipa poani tsio, ja
 pehue po netianape. Ejai
 jemitsoaibotso, huetianaibo,
 eani po canaja bataneti
 tsio. Dipa poani batso,
 daocua eani po cana
 nimetiobape ea. Tadicatapo
 ajai bahuodi.

--Dipamo jico ai se
 pibabama --poani epo.

Tata Lebi biyo po


13 Becata, Tata Jesoso Calilea baiyo
 noahue cuaifatibo isha. Dohuodi tamomotaneti

po cana Jesosoa izedeahuodi. 14 Becata, lele Capenoma cuafñatiboani isha tsio, huada tata Lebi bata. Tata Lebi tata Apeoa bacua epo. Tata Lebi diñelo jemiji poi epo. Diñelo jemihuodi alelajai po etaezo eani epo. Tata Jesosoa tata Lebi cuaetaiqui:

--Ema mi bocueque.

Tata Lebi netianaibotso, bocueibo.

15 Becata, Jesoso, hua boanai cana nae tata Lebia etaezo didiani epo. Apamo diñelo jemiji poi po cana, dia aataisi po cana jodo didiani



dipahue, apamo ecuicha canaja Jesoso bocuebaletanetihuodi epo batso. 16 Bale ai izedeameiji cana beta jodo eani. Paliseo cana epo. Joda canaja, Jesoso masahue po cana nae didiani, baibotso Jesosoa boanai cana dipa cuaenetime ea:

--Jime baque. ¿Cuipa bame atso Tata Jesoso difelo jemiji poi po shili cana nae, dia aataisi cana nae didiani?

17 Joda tsabajatso, Jesosoa izedeameiji cana dipa cuaeme ea:

--Medisina poi po cana abeise cana poi pipoma. Medisina poi po cana bale ai neda batani po cana poi pehue. Ema dipa batahue isha. Ema eohuao cuaiña, jo pehue ajai jibatime po cana paatsahuaibo ezae pipoma. Ema eohuao cuaiña bale dia aataisi batini po cana paatsahuaibo ezae, ai ajai po pacuaehuiqui ezae.

Aimo dihueya po biyo

18 Tata Joanaja boanai cana, paliseoa boanai cana datsiohue aimo dihueya, Tadicatapo poi. Peisha po canaja, Jesoso bacuaiñatitso, dipa cuaeme ea:

--Tata Joanaja boanai cana bedada aimo dihueya. Paliseoa boanai cana dipahue. ¿Cuipa jabatitso miqueda boanai cana dipa piama?

19 Tata Jesosoa joda cana cuaetaiqui:

--Ema jidyó tsio, quima boanai cana aimo dihueya piama. Ai diñetihuodi ajai masha. Abizi ponetihuodi bale ajai masha. 20 Becata, bale, tata canaja ema pajeotaibo. Quetsio ema jeotaiboanio, quima boanai cana aimo dihueya paata ja. 21 Bale aimo dihueya po alelajai, da esi po alelajai pehue.

Tsio Jesosoa shacua po alelajai cana dipa cuaedeame ea:

--Shacuacata po masha pezo metse jaibai esi pilapaiboma polelajai. Dipa ataomo, da masha pezo, shobichanatso, jaibai palemameibo isha. Dipa potso, biocata lalame papoibo isha. 22 Dipahue, izi shacua atso, izimei esio pizobiaiboma. Izi shacua izimei esi meo zobotetsomo, izimei semijianae papoibo. Daocua izi zoyatiana papoibo. Izi na shacuahue isha, emei shacuahue isha pehue po meo azobiajai pehue.

*Janahuaibolelajai po
tseiñeo cana biyo*

23 Janahuaibolelajai tseiñeo, Tata Jesoso, boanai cana nae, teje dizia poyoa. Teje doeteo poyoani tsio, hua boanai cana zia beta lalotani. 24 Datsio paliseo canaja Jesoso dipa ea:

--Shamanetique. ¿Cuipa bame atso, miqueda boanai canaja zia lalotani? Janahuaibolelajai tseiñeomo dipa ai piama polelajai pohue bime dipa.

25 Tata Jesosoa paliseo cana dipa cuaeme ea:

--¿Tata Dabida biyo ai pitsabama sha micana, huada, hua bocuei cana aidyijae tsio? Damo bale dipa ai bamehue. 26 Atsono dipa pome tsio, tata Abiata Tadicatapo nae mimiji poi po, cuichacata po, tsio. Datsio tata Dabida Tadicatapoa etae nobi. Mimiji poi po canaja Dabida eiseasha po laba etia. Mimiji poi po canaja pehue eiseasha po laba dihuodi polelajai. Tata Dabida Tadicatapo nae mimiji poi po tata pipoma bime, edia. Dipahue, huada da laba hua bocuei cana shipa tidyea isha, pa dita pojo. Tata Dabida cana aidyijaecata batso "dipa piama meaque", Tadicatapoa dipa cuaeme piama ea bime. 27 Tadicatapoa janahuaibolelajai po tseiñe cana ata, ecuicha cana paatsahua ezae, ecuicha cana pajanahuaibo pojo. Tadicatapoa ecuicha canamo toabajaidya ahuodi. Janahuaibolelajai po tseiñe cana toabajaidya piama. 28 Ema tata poi dya isha, bale Tadicatapoa ema ilota. Tadicatapomo eataniohue. Emamo dipahue. Janahuaibolelajai po tseiñe

cana cuipa a atso tso jaidya po quiamo ai dipa bamehuemo.

Capitolo 3

*Meatsa cuibichana po
tata biyo*

1 Noahue Tadicatapo nae mimilelajai po etaezo Jesoso nobibo isha epo. Meatsa cuibichana po tata do neti epo. 2 Peisha po



eani po canaja Jesoso shamatani epo,
 janahuaibolelajai tseifneo, Jesosoa meatsa
 jaihue masha meibo quepotso paba ezae.
 Janahuaibolelajai po tseifneo jodio canaja ai
 cuipa piama alelajai. Dipa poani batso, Jesoso
 shamatani epo. Jesosoa meatsa jaihue
 metaibojomo, da canaja joda ifnaibo. 3 Jesosoa
 da meatsa cuibichana po tata cuaetaiqui:

--Anitsoaiboque. Jidyó pobeapasique.

4 Jesosoa eanicha po cana bicuaebajaibo:

--¿Janahuaibolelajai po tseifneo que bale
 ja atso balea jaidya polelajai po? ¿Ai ajai
 meibo? ¿Ai masahue meibo? ¿Neda bai po cana
 ai neda mahue meibo? ¿Neda bai po cana
 piatsahuama pehue? ¿Que bale ja atso balea
 jaidya polelajai po janahuaibolelajai po
 tseifneo?

Eanicha po cana cuipatso ja ai pipoma.

5 Jesosoa eani po cana azaiquitso
 toalelahuiqui. Da canaja anecata bata quia
 bata pipoma batso, Jesoso amosone. Datsio
 Jesosoa meatsa cuibichana po tata cuaeibo:

--Meatsa iloacuaeque.

Ilocuaetso, jaihue cuaiñamashaibo epo.

6 Paliseo cana huetianaibo. Huetianaibotso,
 tata Jelodea tata cana nae jacuaeti. Tata
 Jesoso pamanoemeibo ezae jacuaeti ea.

--¿Cuipa bale ja cuada atame Jesoso pamanoemeibo ezae? --epo.

*Jesoso apamo cana
jaihue mehuodi biyo*

7 Tata Jesoso, boanai cana nae ponaibo. Calilea bai lai jiyo cuaiñati. Apamo Calilea eohuao neti po cana tiacata ponaibo. 8 Tata Jesosoa apamo ai ajaicata ahuodi. Tata cana, mama cana jaihue meibohuodi. Dipa poani tsabajatso, apamo Jelosalene lele canaja, Idomea eohuao canaja, Jodea eohuao canaja, Jesoso najo huacuaiñaibo. Mano Jodana shipa neti po canaja, lele Tilo, lele Sidono po canaja dipahue Jesoso najo cuaiñaibeibo. 9 Apamo ecuicha cana dohuodi batso, Jesosoa, hua boanai cana ecuae:

--Canahua bajaichanaque, da meo ema paanibo pojo, ecuicha cana nae ema cuatacata pipoma papo pojo.

10 Tata Jesosoa ecuicha cana apamo jaihue masha apetaiquiba batso, daocua cuahue ai neda bai po cana jeanahuiqui, jeanahuiqui ahuodi, Jesoso pa-itsobaibo ezae. 11 Masahue po midyojo bade po shama canaja, dipa pohue Jesoso baibotso, joda botseo LOOO pojaiña. Dipa potso:

--Midya Tadicatapoa bacue deacata --shama canaja tsaiyahuiquihuodi.

12 Jesosoa bale shama cana cuaesani:

--Tsedapo cana dipa cuae omae.

Boanaicata pomo dose po biyo

13 Dipa popetso, Jesoso eohua shocuelimio potsoati. Ai se tata bale ja baibotso, huada:

--Jidyó pobeaque --ea.

Da cana Jesoso najo popeibo. 14,15 Dose po tata cana dia epo. Jesosoa da dose po tata cana hua boanaicata pomo cana poi dia ea, joda nae papo ezae, pacuaedeatca pojo, tata midyójo bade po masahue po shama cana pameiyamehuiquicaibo pojo. Jesosoa joda canaja dipa ahuiquibotoa eame. 16 Joda dose po dipa banime pahuodi:

Peada tata Simono banime. Tata Jesosoa bale Simono peisha po banime eahuiquibo. Tata Pedelo eahuiquibo.

17 Tata Jacobo peada. Tata Zebedeoa bacua epo.



Tata Joana peada. Da Jacoboa mamazao
epo. Jesosoa huatseda salala bacua
detse banime eahuiquibo.

- 18 Tata Adese peada,
tata Felipe peada,
tata Batolome peada,
tata Mateo peada,
tata Tomasa peada,
tata Jacobo peada,
tata Tadeo peada,
tata Simono peada.

Jodamo mipahue ai mimitsoa netime.

19 Peada tata Jodasa Icaliote. Joda
tata Jesosoa hua boanaicata po poi ea dipahue,
bale becata tata Jodasaja Jesoso jeomeibo,
pa-isheta pojo. Dipa Jesosoa boanaicata po
canamo jemiquibo ea.

*Tata canaja Jesoso biyo
tsiloda cuaeme eatani po biyo*

20 Tata Jesoso huada etaezo cuaiñatibo.
Noahue isha ecuicha cana tamomoneti poibo.
Dipa pojo, tata Jesoso, hua boanai cana culpa
ba didiame batini epo. 21 Jesosoa doemetse
canaja, da tsabajatso, poti, Jesoso pajetibo
ezae.

--Huada nimejono pidojoma. ¿Quetsio ba
didiacata? --pohuodi.

22 Datsio, ai izedeamei tata cana,
 Jelosalene jeneti po jodo neti epo. Da cana
 dipa jacuaetime pohnodi epo:

--Jesoso Satanasaja poi. Masahue po shama
 cuichacata poa Jesoso peaso eme, ajoji eme.
 Dipa batso Jesosoa shama cana
 meiyamehuiquihuodi.

23 Jesos^a bale da ecuicha cana
 jejeiQuitso, pabahuicuae ezae, dipa eatani ea:

--¿Satanasa huaapohue eiloi cana
 meiyamehuiquibo quepotso? Mi isha da. Dia
 potoa pipoma pohue dia bame. 24 Apamo ecuicha
 cana, dohuodi popeibotsomo, ado-ejetitso netime,
 aiyo netime. Joda ecuicha cana, bale, dohuodi
 po cana nae adojo potsomo, jameiyapetibo pehue.
 25 Dipahue doemetse cana, doemetse nae adojo
 potsomo, jameiyapetibo, do peada, do peada, do
 peada pehue. Aiyo poi netime pipoma. Maesa
 poibo. 26 Dipahue, Satanasa, huada eiloi
 shama cana nae adojo poibotsomo, jameiyapetibo.
 Becata, eiloi cana tsaai batso, eatanihuecata
 pipoma. Maesa papoibo poi pehue.

27 'Ai se tata ja tata cuichacata poa
 etaezo nobijae potsomo, ai huale cana pajeo
 ezae, eshoi ijinetitso, nobimane. Datsio huada
 ai huale cana jeopeibomane.

28 'Daehuecata isha da cuaesani ya mi,
 ecuicha canaja ai masahue po canamo aibotsomo,

cuaepetaibojo, Tadicatapoa iboetaemepodaibomane.
Ecuicha cana Tadicatapo cuichao mimi isi pojomo,
cuaepetao Tadicatapoa iboetaemepodahuiquibo.

29 Ai tata ja Tadicatapoa shama lacua cuichao
mimi isi potsomo azalo netime pehue. Dipahue
jetana pehue. Tadicatapoa joda iboetatoa
pipoma.

30 Jesosoa dipa cuaeme ea, eani po cana
jepea:

--Huada masahue po shama dojoani --poani
batso.

Tata Jesosoa doemetse cana

31 Dipa atao, hua huadi, mamazao cana
cuaiñaibo. Etae tsecueanai pejo neti tsio,
dipa cuaeme ea:

--Tata Jesoso mi cuaeanaticame, cuama
cuaiñaiboani po, pabashaota pojo.

32 Apamo ecuicha cana Jesoso pejo eanicha
epo. Joda canaja shipa cuaedeati:

--Tanibime. Miqueda huadi, miqueda mamazao
cana etae tsecueanai pejo netica. Midya
pabashao ezae netiñapeiqui.

33 --¿Ai se bale ja quima huadi? ¿Ai se
bale ja quima mamazao cana?

34 Daocua eani po cana toalelani tsio,
Jesosoa cuaetaiqui:

--Ojo quima huadi, ojo quima mamazao cana.
 35 Ai se tata Tadicatapo nae ailotajai po bale,
 quima mamazao pohnodi. Ai se tata dipa pojae
 po tata po bale, quima mamazao pohnodi. Ai se
 mama dipa pojae po mama po bale, quima dodo
 pohnodi, quima huadi pohnodi.

Capitolo 4

Jaja zazaiji po tata biyo

1 Bai jalidya po lai jiyo noahue isha
 eizedeameibo isha. Ecuicha cana apamocata
 tamomoneti Jesoso pejo. Tso bidyiloa ea.
 Dipa poani batso huada bai nao canahua meo
 eaniqui. Jepe cana bai lai jiye hueletaneti epo.
 2 Jesosoa apamo ai cana cuichao izedeamehuodi
 ea. Nimebaiqui bishapo pehue po batahue metse



izedeamehuodi ea. Dipa eani tsio, huada dipa
cuaeme ea:

3 --Tsabajaidya meaque. Tata teje beneje
poshahuiña, jaja cana pabanapati ezae. Teje
noajaichapetso, eohua nozo nozo pojojo
zazahuiquitani epo. 4 Jaja cana zazatani tsio,
jaja beta dizi tsio eoloti. Boni canaja
pobeatso edia. 5 Jaja cana jepelimi majana
cana dojojo eoloti. Eohua tsatalipi bani batso,
aleo molo. 6 Tseiñe doeteo bale, ashome potso,
shobibineti. Tsaja mahue jabbitso, shomanome
pehue pojae. 7 Beta zeda dojojo eoloti.
Zedaja molotso, zedaja tso bidyiloaeme.
Tabishilipi pojo jajai poi pipoma. Ecuilipi
pehue. 8 Jepe bale eohua ajaicata pojojo
eoloti. Eohua ajaicata pojo esi apobetso.
Acui beise jabbitso, jajai shopome. Jepe bale
jaja apamo. Jepe bale jaja bio masha. Jepe
jaja bale apamocata, atsata epo. 9 Izajai
potsomo, ai tsabajajaidya pomane. Dipa dia
asadi pipoma potame sahua --Jesosa ea.

10 Becata peisha po ecuicha cana
ponapeibojo, Jesoso, bocuei cana nae, boanaicata
po dose nae pehue do bai laijiyo epo. Joda
canaja Jesoso bicuaebajata:

--¿Cuipa bame atso tso joda cuaeni?
¿Cuipa bame atso tso nimebaiqui bishapo pehue
po batahue cuaeni?

11 Jesosoa cuaeiqui:

--Tadicatapoamo micana hua alelajai cana, polelajai cana cuaepeibohuodi. Micana tsitsabajama ahuodi. Pejo po canaja bale pitsabajama. Nimebaiqui bishapo pehue po cana batahue cuaeme aiboani, pejo po canaja pitsabajama paata pojo. 12 Pitsabajama paa pohue, basahuodi bime dipa. Pitsabajama paa pohue, tsabasahuodi bime dipa. Joda cana idya ane isha elijo pipoma papo pojo. Joda canaja masahue po cana Tadicatapoa piiboetama papo pojo.

13 Jesosoa hua boanai cana shipa cuaeme ea:

--¿Joda tata zazaiji po biyo pitsabajama sha micana? Ya mi peisha po nimebaiqui bishapo cana batahue cuaejaomo, dipahue isha pitsabajama isha ja? ¿Cuipa ba tsabajajaidya ame ea cata? 14 ¿Joda tata jaja cana zazatani po, ai batahue tso? Tadicatapoa jejeme shipa cuaedeahuodi po tata batahue dipa. 15 Pezohue ecuicha cana dizi tsio eohua alacua pojojo batahue. Ajasha. Da ecuicha canaja, Tadicatapoa jejeme tsabaja. Satanasa shili bale aleo pobeani joda jejeme cana pajeobo ezae, pa-iboetamehuiquibo ezae. 16 Pezohue ecuicha cana majana eohua batahue, deselipi eohua batahue. Da cana Tadicatapoa jejeme tsabajatso,

shojemiquime. Abizi. 17 Jaapo batahue bale, tsaja mahue po batahue bale. Becata naeda adojo batani, Tadicatapoa jejeme jemiquitani batso.

Da batso joda canaja Tadicatapoa jejeme nimebahueyaibo, sho-iboetahuiquibome.

18 Pezohue ecuicha cana zeda dojojo eohua batahue. Tadicatapoa jejeme tsabaja.

19 Peisha po alelajai cana nimebani bime. Diñelo apamo jemibojae. Ai huale cana jemibojae. Da cana shili pehue nimebanetihuodi.

Tadicatapoa jejeme nimebahueyaibo. Tadicatapoa jejeme tso bidyiloa batahue. Joda ecuicha cana jatseiñebati ajai pipoma. 20 Pezohue ecuicha cana bale eohua ajaicata po batahue.

Tadicatapoa jejeme tsabajatso, nimejono metse shojemiquime. Pezohue da cana cuaesocata abeibei poi. Pezohue bale abeibei poi masha. Pezohue bale abeibei poicata, eaniohucata. Tadicatapoa jejeme jodo jajai shopome batahue.

21 '¿Aapo tsio, ode huetamane, tasa metse patomo ezae quepotso? Shabame. Ai mo dipa poi pipoma. Huoshoatso bale, huetamane, ai pa biotsoa ezae. Da batahue isha quima ecuae po cana. Patomo ezae, padilo ezae pipoma. Ecuicha cana peaso masha pameibo ezae poi bale.

22 Becata daocua cuahue loboti po cana tsabatai mepeibo. Daocua cuahue diloti po cana batai

mepeibo. 23 Izajai potsomo, ai tsabajajaidya pomane.

24 Belicata huada cuaeme ea:

--Ai tsabani tsio boanatame sahua.

Boanahuodi po cana bale tsabaja pamoda alelajai, Tadicatapo biyo peaso poi masha poibolelajai.

25 Boanahuodi po cana Tadicatapoa cuae pamoda. Piboanama eatani po cana bale apitsa masha polelajai.

*Tadicatapoa ecuae po cana
jo pehue poi po batahue ai mei poi*

26 --¿Tadicatapoa ecuae po ai tso batahue? Zia moloani po batahue. Tataja tejeo zia soto. 27 Sotoanatitso, leleomo tseiñe batseiñe isha, jasisa isha. Dipa pohue netime. Zia jaja cana molotsaneibo, esi poibo. Da tataja bale bea cuipa zia cana moloememe, huocuaememe. Apitsa. 28 Dipa pohue zia cana eohua miosoeneti molocuaiñana polelajai. Cuetsa tima babetsota. Becata huisosoatini. Becata nana. 29 Becata molichapeibo. Da tsio bale da tataja jijo peibo, piihuima papo pojo. Da batahue isha Tadicatapoa ecuae po cana jo pehue poi po batahue ai mei poi, tsi-a eatani poi po cana poi polelajai.

Motasa acui jaja po biyo

30 --¿Ai po batahue tso Tadicatapoa poi po canamo? --Jesosa bicuae bajaibo--. ¿Aitso yama micana cuaeibo pa-izedeameibo ezae?

31 Tadicatapoa ecuae po canamo motasa jaja po batahue isha. Bananani tsio, da jaja eimahuecatalipi. Da bale eimaocata.

32 Banatso bale esi apobetso bime. Sha bapai. Peisha po bana pomo cana bio masha. Joda huizabotojo huiñada bani batso boni cana do janahuaibolelajai. Dipa Tadicatapoa poi po cana. Dipa delatiyoa.

33 Apamo dipa nimebaiqui bishapo pehue po cana metse Jesosa tsedapo cana Tadicatapoa alelajai izedeamehuodi ea. Joda canaja nimejono metse dojoatoa po, daocua huada izedeamehuodi.

34 Ecuicha cana apamo neti tsio, nimebaiqui bishapo pehue po cana metse pehue izedeamehuodi ea. Bale peisha po cana ponapeibojo, Jesosa hua boanai cana cuapeibo ea, da cana pitsada mahue pabata pojo.

*Jesosa beni, bai na
shehuihuiqui po biyo*

35 Da tseifneohue eapo poani tsio,
--Cuada japetoanatibo --Huada hua boanai
cana mepoa ea.

36 Peisha po cana meiyashahuiñaibotso,
 boanai cana Jesoso nae pojaenaibo. Canahua meo
 aniquibotsohue, da poshahuiñaiquibahue epo.
 Boanai cana jepe peisha po canahua cana meje
 petoanatibo. 37 Petosatiboaniohue, beni ajoji
 badeiña. Benia lepetao, ena comahuiqui ea.
 Canahua meo ena momojejeani epo. 38 Beni
 badeiñani tsio bale Jesoso tahuijamane. Mata
 bene canahua meo, shoahuanai biyo, tahuijamane.
 Boanai canaja cuaeta:

--Izeiboque. Cuama beo huidyiboani.

¿Bajaidya queatso?



39 Eizeibotso, Jesosoa beni shehuihuiquibo.

--Mi potaibome sahua --ea.

Dipa atao, beni mitsichanaibo, na
mitsichanaibo. 40 Tsio, Jesosoa hua boanai
cana cuaeme ea:

--¿Japotso micana queoli shopome?

¿Tadicatapoamo eatsahuatani jabatimehue pipoma
micana pojo sha dipa?

41 Da cana bale nimetioba batso dipa
tsicuaebajati poani epo:

--¿Ai se tata cata ja? Eataniohucata.

Beni, bai na ashehuitajai. ¿Ai se tata pojo tso
dipa?

Capitolo 5

*Jamasametiji po shama cana
bade po tata biyo*

1 Mamaima cuaiñatibo, Cadaleno cana netica
po dojojo. 2 Jesoso ebeiyo netitsoatibo. Jodo
jamasametiji po shama bade po tata tsopahuaneti.
Metsi elele jeneti pobeani po tsopahuaneti.

3 Joda metsi dojojo netilelajai. Piijimamo
etse. Ado-eje pohue bisha etse dia a. Peama
sicho metse ijitao, ijisadi. 4 Ecuicha canaja
ebaiyo ijihuodi, peama sicho metse, huatsio
ijihuodi peama tashoi batahue metse. Do tatse
atao, huadamo peama sicho cana lijihuodi,
huatsi tashoi lijihuiquihuodi epo.



--¿Cuipa atso bisha ja etse tsiani ame?

5 Tseiñe misi, sisa misi tsitsia ahuodi.
 Metsi cana dojojo, eohua tijitiji cana dojojo
 tsitsianeti polelajai. Majana acueo po metse
 jo pehue jacuelijiquilelajai. 6 Huada aocuepi
 pohue, Jesoso baneti. Jododotitso, Jesoso
 botseo pai pojaiña. 8 Jesosoa masahue po shama
 cana dipa mepoa ea:

--Memeyahuiquique. Joda tata midyojo
 pifetima mepoque.

7 Dipa mepoa ataibojo, da tataja pajae zeiiye cuaetaiqui:

--Midyamo da Tadicatapoa bacue dea. ¿Cuipa jabatitso tso mi pobeani? Neda ema me omae. Paa pohue ema a omae.

9 --¿Ai banime tso mi? --Jesosa bicuaebajataiqui.

--Cuama apamo jabatitso quia banime "Apamo Maiyaijime" --shama dojoya cuaetaiqui.

10 --Shama cana aocuepi piahuiquima atame sahua. Peisha po eohuaio piahuiquima atame sahua --shama dojoya dipa cuaeti cuaeti ame ea.

11 Ai aocuelimi, bai laiyye, cotsi cana apamocata pojamane.

12 --Cotsi cana cuichao cuama ilohuiquibomane, cuama joda cana cuichao panobi pojo --cuaeti cuaeti ea isha.

13 Dipa ataibojo:

--Ja. Da dipa poque --Jesosa cuaetaiqui.

Dipa cuaetaibojo, masahue po shama canaja da tata meiyaiibo. Cotsi cana cuichao nobi. Cotsi cana dos mili (2000) pomane. Shama cana nobibojo bale, daocua cuahue tenaboteapeibo, baiyo. Jododotitso co, jododotitso co. Huidyipeibotso, mi epo. 14 Cotsi cuiñai po cana, queoli potso, jododonaibo lele beneje.

Da dipa poa po ecuae. Leleo, lele tsahuao ecuae. Ai tsabajajama po cana pobeá, pabaibo ezae. 15 Jesoso najo cuaiñaibotso, shama cana dojoyi polelajai po tata do eani eba. Jaibaiji poibo eba. Jidyá isha nimejonoi poibo eba. Dipa batso, da cana queoli epo. 16 Dipa eatani baja po canaja da dipa poa po biyo cuaepeibo ea. Masahue po shama cana dojoyi jaihue cuaiñaibo po biyo cuaepeibo. Cotsi cana biyo cuaepeibo ea. 17 Dipa tsabajatso, joda Cadaleno canaja Jesoso dipa cuaeti cuaeti ea:

--Jidyó pianima potame sahua. Naatso ponataibome sahua.

18 Jesoso canahua meo eaniquiboani tsio, shama cana dojoyelajai epoa tataja bicuaeabajati bicuaeabajati ea sahua:

--Pasopojomo ya mi bocuetame.

19 --Ema pibocuema. Miqueda etaezo pehue netijajobomane. Miqueda doemetse cana najo pehue netimane. Dojoyicatapoa dipa ata po cuaemane doemetse cana. "Dojoyicatapomo aliso mepojaehue batso, atsahuataiqui," dipa cuaemane --Jesoso mimi.

20 Joda tata poshahuiñaibo. Huada eohuao, diese lele eja pojoyo po eohuao, Jesosoa dipa atsahuata po biyo cuaejajobo. Daocua tsedapo cana da tsabajatso nimetiobape ea.

*Tata Jailoa bacue pona po biyo
ami poshajahue batini po mama biyo*

21 Noahue isha canahua meje petoanati
isha. Petoanati bojo, apamo ecuicha canaja
noahue bacuaifiaibo isha dohue isha, bai laijiyo.
Maiyaneti dohuodi epo. 22 Datsio, tata Jailo
hua cuaifiaibo. Joda cuichacata. Tadicatapo
nae mimilelajai po etae da biatoabahuodi.
Peisha po cuichacata po tata cana nae dipa
mehuodi. Tata Jailoa Jesoso banetitso, botseo
LOO pojaiña.

23 --Quima anodilipi miicata poiboani.
Pasopojomo mi pobeapasitame, quima etaezo
noaticame. Itsobacuaetame sahua, jaihue quia
papoibo pojo, pimanoma quia papo pojo --tata
Jailoa dipa bicuaebajati, bicuaebajati.

24 Jesosoa tata Jailo bocueibo. Peisha po
cana apamo do ifajahue eana. 25 Da ecuicha
cana dojojo ami poshajahue batini po mama epo.
Dose mala bepoa dia potsaneibo. 26 Dipa poani
tsio medisina poi polelajai po cana
babalenetihuodi epo. Dya joda banati, dya joda
banati, posaibo. Da poi difelo tipehuiqui.
Jaihue pipoma bime dipa. Masahuehue bime dipa.
27,28 Jesoso apamo ecuicha cana jaihue
meibohuodi tsabajalelajai batso,

--Yama Jesosoa jaibai itsobatso bale,
jaihue poibo --dipa nimetsiba ea.

Dipa jabatitso, Jesoso bebacuae cuaiña.
Jesoso jaibai cuichao cuata eacuaeanati.

29 Jesoso jaibai cuata eani mepaihuecata ami
mi poanaibo. Hua emi huiña poibo bati.

30 Tsedapo peada jaihue meiquiba, Jesoso dipa
aiquiba jabatimehue. Dipa aici jabatimehue
epo, joda pibahuiquima bime. Jabaleleatitso
Jesoso bicuaebajame ea:

--¿Aiyaja tso quima jaibai itsobacuaeta?

31 Hua boanai canaja Jesoso cuaetaiqui:

--Apamo ecuicha cana pejuhucata.

Jeanatani. COO eatani apamo. ¿Cuipa potso
dipa cuaecuaeme poani, "¿Aiyaja tso quima
jaibai itsobacuaeta?"?

32 Jesoso bale toalelahuiqui, da dia
ataiqui po paba ezae. 33 Da mama, emi jaihue
idya isha batini batso, lilia nae pobeá. Jesoso
pejo toloneti pojajotso, cuaecuaepeibo.

34 --Mamalipi, yama eatsahuani jabatimehue
midya poani batso, jaihue meiquiba. Nime ajai
metse poibomane. Tso mique ane balelajai po mi
poetiba --Jesoso dipa eahuiquibo.

35 Jesoso dipa poneti tsio, jepe Jailoa
etae jeneti noahue pobeibo isha, pacuaeanatibo
ezae:

--Miqueda anodi tso manoetiba. ¿Ai ezae
bisha da bahuicuaeji po tata jadeati? --da
canaja tata Jailo cuaeta.

36 Da tsabajatso bime, Jesosoa tata Jailo dipa shabajame ea:

--Mosojo zei pipoma potame sáhua. Yamamo eatsahuani jabatimehue pehue potame sahua.

37 Jesosoa, Pedelo, Jacobo, hua mamazao, Joana dipa cuaeiquime ea:

--Ema mebocueque.


Daocua bale. Peisha po cana bale Jesosoa bocuetoa podahue eahuiquishahuiñaibo. 38 Tata Jailoa etae cuaiñatitso, Jesosoa ecuicha cana tajaja tajaja poanaja bacuaiñati. Pani, jejeani potaneti bacuaiñati. 39 Etae nobibotso:

--¿Japotsó micana dia poneti? Da anodilipi mano pipoma. Tahuija pehue --dipa cuame eacuaiñati.

40 Eani po cana bale da tsabajatso, eizibapeti. Joda dia poani po cana Jesosoa huetianamepehuiuibo. Jesoso, anodia tadi nae, huadi nae, hua boanai cana nae anodi eja po pejeje, nobibo. 41 Anodia meatsao iñatso:

--Anodi anitsoaiboque --Jesosoa cuaeiqui.

42 Dipa eatani mepaihuecata, eanitsoaibo, poshahuiñaibo. Joda anodi dose mala esi epo, dipa epo tsio. Shamataneti po canaja nimetioba cueme ea. 43 Bale Jesosoa tsedapo cana cuaesaiqui:



--Jaihue meiquiba po biyo shipa
picuaedealboma isha meaque. Ai metiaque
paditaibo pojo.

Capitolo 6

*Tata Jesoso joda netilelajai po
leleo poshaoni po biyo*

- 1 Jesoso lele Capenoma jenetimo pojaenati.
Hua boanai cana nae ponaibo. Joda netilelajai
po pojojo cuaiñatibo, Nazale leleo.
- 2 Janahuaibolelajai tseiñeo, Tadi nae

mimilelajai po etaezo Jesosoa eizedeameibo.
 Apamo ecuicha cana eanicha epo. Jesoso
 tsabajatso, nimetioba.

--¿Aiyaja izedeame pojo tso dipa? ¿Ai se
 cata ja dipa poi potso Jesosoa izedeamehuodi?
 ¿Ai nimetiobai po cana eatani, sha? --da cana
 poani epo--. 3 Bale mama Maliaja bacua, etae
 poi balelajai po tata pehue jodamo. Huada
 mamazao cana, Jacobo, Jose, Jodasa, Simono jidyó
 netilelajai. ¿Cuipa bame atso cuama
 izedeamehuodi? --poani epo.

Jesosoa izedeametani jabatitso, jodo neti
 po cana doda cueme batana. 4 Jesosoa joda
 cana cuaetaiqui:

--Hua apohue leleo netica po canaja
 Tadicatapoa jejeme cuaeji po tata iyoda pibama
 polelajai. Hua doemetse canaja, hua etae neti
 po canaja dipahue, da iyoda pibama. Peisha po
 leleo cana po bale tsabajajae. Da canaja bale
 cuaeji po tata aiyo bahuodi.

5 Jodo ai nimetiobai po cana apamo Jesosoa
 aibotoa pipoma. Betalipi pehue neda batani po
 cana itsobacuaetso, jaihue meiquiba. 6 Jesosoa
 eatsahuatani jabatimehue pipoma joda cana poani.
 Dipa poani batso Jesoso nimetioba ea. Peisha
 po lele cana Jesosoa babaleti. Da leleo po cana
 bale eizedeapeiboani epo.

*Jesosa boanaicata pomo
dose po eilopehuiuiboani po biyo*

7 Becata Jesosa hua boanaicata po cana
dose po joda pejo jejeiquipasibo, pa-ilohuiuibo



ezae. Jesosa da cana ilohuiqui, peisha po
tsedapo cana pa-izedeametaibo pojo. Betacata
eiloi hua poti, betacata jomopo, betacata ma
bene. Dipa eapehuiuibo. Ehuio bale Jesosa
dipa cuaeibome ea:

--Yama mi cuaesani, masahue jametiji po
shama dojoi po cana tejetitsomo, masahue po
shama cana meiyamepehuiuibo huodi amane.

8 Eichoi pehue medojoque. Laba, ziqui, diñelo
pidojoma meaque. 9 Huatsijozoi bale
jaibaibomane. Betacata aboa poi po jaibai

pijaibaiboma meaque. 10 Ai lele ja cuaiñatiti pohue, bea ai tataja, "ema najo potame sahua", atao bale, do pehue pomane. Da leleo cana cuaeni tsio do pehue jamane, didia pomane.

11 Ai lele ja so "cuamaja leleomo piñobima poque, cuamaja micana tsabajae mahue," ataomo, pobeibo isha tso cuaso po banatimane. Pojaenaiboani tsio, huatsi cuiloshahuiñaibomane, da leleo neti po canaja dipa masahue bamehue paata pojo.

12 Jesosoa ilohuiguicaibojo, hua boanaicata po cana poti. Ai lele ja cuaiñatibotsohue,

--Masahuehuodi jabatitso, idya elijo ane isha mebatique --cuaeme ahuodi ea.

13 Apamo tata midyojo jamasametiji po shama cana meiyamehuiuibo ea. Apamo ai neda bai po cana, aseite batahue metse idyoibotso, jaihue mepeibo ea.

*Tata Jelodea
tata Joana eshoa eseome po biyo*

14 Da nimetiobai po cana cuichao tata Jelodea tsabajapeibo. Tsedapo canaja Jesoso cuichao ibobahuodi batso tata Jelodea tsabajapeibo. Jepe tsedapo cana dipa mimihuodi epo:

--Tata Joana moni. Tsedapo huidyimelelajai po tata, idya eizeneti isha. Manotso bime pobeibo. Dipa batso huada ai nimetiobai po cana ahuodi.

15 Peisha po cana bale,

--Tata Eliasa esi moni --poani epo.

Peisha po cana,

--Tadicatapoa jejeme cuaeji po tata, tsonoda bepoa po cana batahue --poani epo.

16 Bale tata Jelodea, dipa tsabajapeibotso,

--Tata Joana moni --ea--. Yama eshoa seomeana po moni. Manotso bime pobeibo. Eizeneti idya isha.

17 Atsono potso shipa, tata Jelodea hua eiloi cana ilohuiguicana tata Joana pajeticaibo pojo. Tata Joana iñatibotso, dobeibo.

Jetibotso izia mahue eashaibo. Mama Jelodiasa dipa mepotia ea. Mama Jelodiasa tata Pelipea huane posahua. Tata Pelipe, Jelodea mamazao. Tata Jelodea bale tso mejemianaibo. 18 Tata Jelodea dipa meibojo, tata Joanaja dipa cuaeta:

--Maesa, miqueda mamazaohua huane pimejemiquiboma atame sahua.

19 Dipa jatsabajatitso, mama Jelodiasa adojo. Tata Joana manoemejaecata. Tata Jelodeamio bale Joana tsiba pehue masha.

20 Huada tata Joana aiyo bani. Tata Joana ai masahue ai abai mahue batso, nimei netime batso,

ishejae piama. Huada bale tata Joana tsabajaibojae. Joda tsabajatso, ai ja dia eatanicata bame ea, bale tsabajaibojae bime dipa. 21 Becata, bale, tata Jelodea peisha po cuichacata po cana dipa cuaeme ea:

--Pasopojomo micana pobepasitame sahua, quia etaezo ema najo padidiaibo ezae. Quima jaidyaohue epo po tseifneo bihuenani tsio, pobetame sahua. Da tseifneo jana, eami, apamo, ajaicata po, padibo.

Hua cuichacata po eiloi cana, cuichacata po biabahuodi po cana, peisha po cuichacata po cana, Calilea eohua neti po cana, cuaehuiqui, joda najo padidiaibo pojo. 22 Da tseifneo bihuenaiqui tsio, da cana cuafia. Do eani tsio, mama Jelodiasaja bacue pona, noejaja po, nobibo, tata cana botseo tili tili papo ezae. Tata canaja pashamata pojo ezae dipa pohuodi. Dipa tsetsepeibojo, tata Jelode, peisha po tata cana nime ajaihuodi epo. Tata Jelodea da noejaja po cuaetaiqui:

--¿Ai bale ja mique jaidya? Cuaeque ema. Patia. ¿Que bale ja midya bame? 23 Daehuecata da isha cuaesani ya mi, midya ai cuaeibojo, patia. Quima metsecata po eohua, da ai tatsecata tibotoahue. ¿Ai titso bale ja jaidya midya bame?

24 Da tsabajatso noejaja po huetianaibo, huadi pabicuabajaibo ezae:

--"Ai bale ja mique. Cuaque ema. Patia."
ema huada eatani --huada huadi cuaeme
eajajo--. ¿Ai bale ja ema huada tia?

--Tsedapo huidyimelelajai po tataja eshoa,
tata Joanaja eshoa --mama Jelodiasaja
cuaetaiqui.

25 Datsiohue, noejaja po noahue nobibo
isha aleo, tata Jelode najo pojajobo isha.

--Tata Joanaja eshoa behuehue tiboque.
Tsedapo huidyimelelajai po tataja eshoa sepe
meo ishatso, ema tiboque.

26 Da tsabajatso, tata Jelode
nime isiquiana.

"Daehucata paa" eatani batso, dipa pehue
piama atso bale, batani. Peisha po cana eani
batso, dipa pehue piama atso bale, batani.

27 Batso tata Jelodea biabahuodi po tata
sho-ilo'huiquibome ea, tata Joanaja eshoa
pajeticaibo pojo. Biabahuodi po tata
ponaibotso, iziamahuetaezo, tata Joanaja eshoa
seotibo. 28 Sepe meo ishatso, dobeibo,
noejaja po tihuiqui. Noejaja poa huada huadi
shipa tidyeibo isha. 29 Tata Joanaja boanai
cana da tsabajatso, pobeia, tata Joanaja cuicha
pajeobo ezae, metsi meo pa-ishaibo ezae.

*Jesosaq̄a laba, jae cana
huocuaemetani ea po biyo*

30 Jesosoa boanai cana pobeibo. Jesoso najo cuaiñaapelbotso, eaibo bapejaiñaibo.

--Dipa aja. Dipa ya izedeame aja

--cuaeme eajaiñaibo.

31 Boanai cana dipa cuaeme apetaibojo,

--Beo, tsedapo cana tsaai beneje cuada poibo, do pajanahuaibo ezae --Jesoso dia po sahua.

Apamo cana do nojoshahue. Quetsiomo ai ñimeoma eani pipoma. Pa ba didiame epo. Dipa jabatitso Jesoso dia poshahuiña sahua.

32 Tsedapo cana tsaai beneje, canahua meje pojaenaibo. Tata Jesoso, hua eiloi cana nae pehue. 33 Tsedapo canaja aocuepi pohue bai laiyye neti baneti. Tata Jesoso, hua boanai cana nae, da canaja bamehue ea. Lele cana misiohuae neti tsedapo cana jododoti. Jesoso, boanai cana nae cuaiñatiboani pojojo, eshoi cuaiñaapeibo. 34 Ebeiyo netitsoatitso, Jesosoa tsedapo cana apamo maiyaneti banetitsoa. Da tsedapo cana obeja cana, cuiñai po tata mejehue po, batahue, Jesosoa dipa nime tsiba ea. Dipa batso po biyo Jesosoa amosone tsiba batani ea. Izedeamecuaiñatibo isha, ai biyo. 35 Eaponani tsio, hua boanai cana Jesoso pejo cuaiñaapeibo.

--Jidyō ai dia tsaai. Tso eaponani.

36 Peisha po cana ilohuiquique jana
pacuaebajaticaibo pojo, pa dia ezae --ea.

37 Bale Jesosoa cuaetaiqui:

--Micana ai metiaque padita pojo.

--Ecuicha cana apamocata bale --da canaja
ea--. ¿Cuipa atso ba cuaebajapecata? Peadahue
tata apamo tseife modome potso bale etse difelo
jaipicata ba.

38 --¿Laba queocua eani? Mebanatique
--Jesosoa ea.

Banatitso; --Sico laba eani, betacata jae
lalelimi nae --hua boanai canaja cuaetaiqui.



39 --Notsa biyo meanibotepasique. Jepe jidy, jepe mabene, jepe jomo, dipa mepoque --Jesosa eahuiqui.

40 Ataibojo, da cana eaniboteape, jomo sieto (100) huocuahua, dyabene sicueta (50) huocuahua, jomo sieto huocuahua, mabene sicueta huocuahua. 41 Laba, jae cana jemiquitso, Tadicatapoa lele bene bahuiatsoani tsio, Jesoso Tadicatapo nae mimi. Laba pezotso, huada hua boanai cana etia. Da canaja shipa tidyeape. Dipahue, jaelimi pezotso, etia, daocua cuahue tsedapo canaja padita pojo. 42 Titao didia.



Ai dijae mahue poanaibo. 43 Dose ziqui meime jemibo, ize epo po laba pezo cana, jae pezo cana. 44 Tsedapo cana apamocata dojoimecata didia. Sico mili (5000) didia.

Bai na biyae Jesoso poyoa epo po biyo

45 Didiapelboani mepaihuecata, Jesosoa huada boanai cana dipa eahuiquibo:

--Canahua meo meaniquiboque. Micana ehuiio mepetoanatiboque. Lele Betsaeda mebanatique.

Boanai cana ponaiboani tsio, Jesosoa peisha po cana dipa eahuiquibo:

--Meponaiboque. Miqueda etaezo pojajobomane.

46 Da cana ponaibojo, Jesoso eohua shocue ajalili po matae potsoatibo, Tadicatapo nae pamimijajobo ezae. 47 Zeti eolotini tsio, boanai cana canahua meje bai doeteo poyoa.



Tata Jesoso jo pehue eohuao neti. 48 Beni tozashahue batso, boanai cana cuaifiatibotoa pipoma. Asahuacata poani, Jesosoa eba. Huena cuanao, bai na biyae, Jesosoa poyoa, bai papetoanaibo ezae. Boanai cana batadao tsio, 49 hua boanai canaja joda bai na biyae poyoani baneti. Jesoso bamehue piama. Shama bame bale.



Shama bame eani tsitsia. 50 Daocua cuahue, Jesoso banetini jabatitso, queolicata cueme poana. Dipa poani jabatitso, tsitsia. Jesosoa bale dipa shocuaeme eaneti:

--Pa. Maesa. Ema da isha. Queoli pipoma mepoque.

51 Canahua meo, boanai cana dojojo, aniquibojo, beni mi poibo. 52 Jesoso dipa ilome eatani jabatimehue pipoma poani batso, da cana nimetiobacata, noahue isha. Jesosoa laba,

jae cana huocuaeme eba bime, "Tadicatapoa todi pojo sha dia poani," piama. Dipa bamehue ai bai pipoma. 53 Japetoanatibotso, Jenesalete eohua cuaiñatibo. Da pejo canahua eiji. 54 Ebeiyo netitsoatiboani mepaihuecata, do netica po canaja, Jesoso da bamehue ea. 55 Da batso da cana jododobaleti, daocua cuahue huetsiohue leleme po cana pacuaeanatibo ezae, ai neda batani po cana pajeti ezae. Jesoso najo docuaiñape. Jesoso jodo neti, tsabajatso, ejata po cana dahua donahuodi eape. 56 Ai lele ja cuaiñatiti epohue pojo, do netica po canaja neda batani po cana lele doeteocata huanape. Maailipi leleme po cana dipahue. Ajalili leleme po cana dipahue. Da canaja Jesoso bicuaeti bicuaeti:

--Pobeaque, huada miqueda masha cuenaohue pa-itsobapasita pojo.

Daocua cuajahue itsobapetao, jaihue meibo.

Capitolo 7

Tata esia alelajai po cana biyo

1 Paliseo canaja Jesoso neti po najo cuaiña. Jelosalone jeneti po ai izedeameiji po beta dipahue cuaiña. 2 Jesosoa boanai cana meatsa pisopoma bime didiani, paliseo canaja eba. 3 Paliseo cana, peisha po jodio cana

dipahue, eme sopotsohuodi pehue, didialelajai. Eme pisopoma atsono, mosojo azalo poibo bame. Tata esi canaja alelajai po cana dipa boanahuodi. Dipahuecata alelajai. 4 Jana cuaebajatilelajai pojojo noatitsomo, ahuishihuodi potsuhuodi pehue didialelajai. Apamo peisha po alelajai po cana da boanahuodi. Tsehual cana, tohuaja cana, peama tasa cana mesopotso po tsimehuehuodi alelajai. 5 Paliseo canaja, izedeamei canaja Jesoso bicuaebajame ea:

--Miqueda boanai canaja esi canaja alelajai po cana piboanama. Meatsa pisopoma bime didiani. ¿Ja potso cana dia poani?



6 --Abada bani noshi pehue, micana
 --Jesosa cuaetaiqui--. Tsonoda tata Isaia
 micana biyo datsimehucata dipa cuaeme atana:
 Ojo tsedapo cana mimi metse pehue
 Tadicatapo iyoda bani.

Nimejono metsemo bale iyoda pibama.
 Adojo bime dipa.

7 Tadicatapo nae mimiani tsio,
 mimimo pehue. Bemimini pehue.
 Da canaja tsedapo canaja alelajai
 cana izedeamehuodi.

Izedeamehuodi tsio, dipa cuaeni noshi:
 "Dipa Tadicatapoa cuaetana po cana."

8 Micanaja Tadicatapoa cuaesahua po cana tso
 meiyaibo --Jesosa cuaeme ea--. Tsedapo canaja
 alelajai cana bale daehue boaname ahuodi.

9 Micanamo Tadicatapoa cuaesahua po cana
 tsiiboetamehuiqui, miqueda alelajai cana padojo
 ezae. Dipa miqueda alelajai. 10 Tata Moise
 dipa cuaeme atana: "Miqueda tadi, huadi iyoda
 baque. Ai tsedapoa, tadi, huadi masa bajaena
 bishapo pehue ataomo, joda manoemetaibome
 sahua." 11 Micanaja bale cuaeme ahuodi,
 "Miqueda tadi, huadi cuaemane, 'Yama metseda
 atsahuatoa podahue. Daocua cuahue quima ai
 cana, Tadicatapo poi tso eiseasha'. 12 Dipa
 cuaeme aibotsomo, tadi, huadi atsahuatoa
 pipoma." Dipa micana cuaeme ahuodi. 13 Dipa

micanaja Tadicatapoa cuaesahua po cana
ibeyashana bishapo pehue. Apamo ai dia
eanetihuodi micana.

14 Dipa cuaeme atso Jesosoa tsedapo cana
joda pejo noahue isha jejeiquipasi.

--Ema jiñebajatame sahua. Tsitsabaja
atso bale, pitsada mahue papoibo ezae.

15 Zeibadeo po canamo mosojo azalo jametiji
pipoma. Tsedapo midyojo po cana bale azalo
jаметiji.

17 Jesosoa netica po cana meiyahuiquibotso
etaezo nobi. Nobitso, hua boanai canaja da
cuichao bicuaebajanetime ea. 18 Atao, Jesoso
mimi:

--¿Japo ja micana dipahue isha
tsabajajaidya pipoma? Zeibadeo po cana, cuatsao
nobitso, azalo jametiji pipoma. 19 Ese meo
pehue atsonolimi badetitso, poanaibo pehue.

Jesosoa joda mimi metse dipa izedeame
atana, jana canamo, eami canamo mosojo azalo
mei pipoma. 20 Tsio Jesoso mimibo isha:

--Midyojo bade po cana bale mosojo azalo
jаметiji. 21 Tsedapo canaja, midyojo, nimejono
metse, masahue po cana nimebamane. Ai masahue
po nimebatso pehue potso, etse aibo. Etse dya
joda banati, dya joda banati. Etse ai tsijiji
po. Etse tsedapo isheibo a. Etse mama, tata
mejemideibohuodi ame a. 22 Etse peisha po

canaja ai cana jemibojaehuodi po. Etse dipa ai eanetihuodi a. Etse tsiloda cuaeme a. Etse tsetseshacata po. Etse ai pijemima atso nime isi isi po. Etse dipa noshi jasipatime po o. Etse jo pehue ajai jabatime poi po. Etse pa huale ja netime pehue po. 23 Dipahuodi poi po cana midyojo, nimejono badeiña. Nimejono aiqitso, aibo. Dipa poi po cana mosojo, nimejono azalo jametiji poi.

Tsejono pea po mama biyo

24 Tata Jesuso jodaeneti pojaenatibo. Eohua peisha po beneje poshahuiñaibo. Lele Tilo eja pojojo cuaiñatibo. Do etaezo nobibo. Jodo tsiñeti pojae batini epo. Co ba loboticata, Jesuso bati bime dipa. 25 Peadahue mamaja, Jesuso jodo neti, tsabajaibo. Da tsabajani mepaihucata, Jesuso pejo potibo. Jesuso botseo toloneti pojaiña. Masahue po shama huada bacue ponalipi midyojo bade epo batso, 26 huada Jesuso dipa cuaeti cuaeti ame ea:

--Quima mamalipi midyojo bade po shama meiyamehuiquiboque.

Da mama bale tsejono pea epo, silopenisia tsejonome. Jodio canaja silopenisia cana nio cana batahue jabatime poani. 27 Dipa poani jabatitso Jesusoa joda mama dipa cuaeme aiqi:

--Mochacho canaja jana metse nio cana mihuaibotso, ¿tso quejai? Dipa atso ajai pipoma. Mochacho cana eshoi mihuaibojo bale ajai.

28 --Damo, Tadi --da mama ataiqui--. Bale mochacho cana didiani tsio, nio canaja oloeme po pezo cana dimane. Dipa poani batso ema atsahuacuaeque.

29 Jesosoa joda cuaeiqui:

--Midya dipa easani batso, miqueda etae bene ponalipiboque. Shama tso meiyamehuiquibo.

30 Dipa potso, da mama hua etaezo poibo. Huada mamalipi ejaiyo eba. Jamasametiji po shama bale pibadema. Tso poanapeiquiba, eba.

Izatobo epo po tata biyo

31 Jesoso daeneti pojaenaibo. Lele Sidono bashanaibotso shipa jadeatibo isha. Dipa potso, Calilea baiyo cuaiñatibo noahue isha, diese lele eja pojojo po eohuao. 32 Datsio naedaja izatobo po tata Tata Jesoso najo docuaiñaeme. Da izatobo po tata ajai mimime pipoma epo.

--Itsobatame sahua --da canaja Jesoso cuaeti cuaeti ame ea.

33 Jesosoa izatobo po huetsiolimi doloboa ea, naedaja pibama paata pojo. Dipa atso, Jesosoa hua meatsa metse izatobo po tata eizaja tomoeme. Dipa atso, meatsao cuedi. Hua cuedi



metse joda tataja eana itsoba. 34 Tadicatapoa lele beneje bahuiatsoani tsio, Jesosoa Tadicatapo nae mimicuaeibo. Dipa potso Jesosoa da tata cuaeiqui:

--Huaca poanataibome sahua.

35 Jesoso dipa eatani mepaihue, huada eizaja detse huaca poanaibo, huada eana jaihue poibo. Tsoijai cuaiñaibo.

36 --Jaihue metaiquiba biyo picuaema meaque --Jesosoa naeda ea sahua. Asata bime cuaehuodi. Jesosoa dipa aibo isha tso, idya shipaecata cuaeme ahuodi pehue. 37 Da cana nimetloba cueme.

--Huada ai ajaicata meibomane. Izatobo po cana idya isha ai atsabajajai idya isha huada meibohuodi. Mimitoa pipoma pohue mimimeibohuodi --dipa cuaecuaetini epo.

Capitolo 8

*Ecuicha cana jana tsaai tsio
epo po cana*

1 Datsio, noahue isha ecuicha cana apamo Jesoso najohuodi maiyashati epo. Ecuicha canaja jana tsaai batso, Jesosoa hua boanai cana joda pejo jejeiquipasitana. Joda cana pobeibojo, huada dipa cuaeme ea:

2 --Maiyashati po cana ema pejo potseiñe quimishacata. Jana tsaai poani batso, aliso mepoani ema. 3 Yama, joda cana, aidyijae tsio, hua etaezohue ilohuiquijomo, dizi jeteo, nizo cuaiñasha, jepe acuepicata taeme pojo.

4 Hua boanai canaja bale dipa cuaeta:

--¿Cuipa ba laba metse da cana jidyohuemo, lele tsaai pojojo, dimeibome ea cata?

5 --¿Laba tso zai micanaja queocua eani?
--Jesosoa bicuaebajaiqui.

--Siete laba pehue eani --da canaja cuaetaiqui.

6 --Eohuao meanibotepasique --Jesosoa maiyashati po cana ecuae.

Siete labame po cana jemiquitso, Jesosoa Tadicatapo dipa cuanetime ea:

--Calasia, Tadi.

Atso, laba pezotso, huada hua boanai cana etia, joda canaja shipa tidyeahuiqui isha paata pojo. Boanai canaja datsio daocua cuahue maiyashati po cana shipa etia. 7 Jae lalelimi pea beta eani epo.

--Tadi, calasia --ahuiquitso, Jesosoa dipa cuaeiqui-- Jae lalelimi nae tipai meaque.

8 Atao, daocua cuahue didiape. Aidijae mahue poanaibo. Datsio ize epo po pezo cana ziqui meo lobiahuiquibo ea. Siete ziqui meime lobiahuiquibo. 9 Cuatolo mili (4000) tsedapo ecuicha cana maiyajime epo. Datsio Jesosoa maiyashati po cana hua etae benejehue eilohuiquibo. 10 Dipa apetso huada, hua boanai cana nae, canahua meo eaniquibo. Lele Damanota pejeje po eohua cuaiñatibo.

*Paliseo cana peaja
jacuaecuaeti epo po biyo*

11 Dohue jepe paliseo cana cuaiñaibo. Jesoso nae peaja jacuaecuaeti eajaña. Paliseo canaja Jesoso dipa cuame ea:

--Tadicatapoa ai boanaiji atso bale, ai nimetiobai po atso bale, Huada midya ilota cuama bamehue paa pojo.

12 Jesoso janimebatsatihuodi batahue datsio. Potso mimi:

--¿Cuipa jabatitso dyatsio neti po canaja boanaiji poi batahue po ai nimetiobai po tsani? Daehuecata da ya mi cuaeme easani, dipa cuaeibome piama, dyatsio neti po cana.

13 Tsio huada da cana meiyaibo.

*Paliseo canaja
alelashili po cana biyo*

Canahua meo anibo ishatso bai petoanaibo isha. 14 Hua boanai cana bale laba pidojoma. Tso eiboeta. Laba peadahue pehue canahua meo eani. 15 Datsio masahue po tata canaja alelashili po canamo cuichao, Jesosoa hua boanai cana dipa bitsanehue ea:

--Jabatijaidya po nae pomane. Paliseo canaja lebadola, banetitsomo, damo eibeyahue amane. Jelodea lebadola dipahue, damo eibeyahue amane.

16 Huada cuaetaiqui po biyo hua boanai cana dipa jacuaetitso:

--Cuamaja laba tsaai batso, huada dipa cuaetaiqui ja.

Paliseo canaja alelashili cana, Jelodea alelashili cana lebadola batahue Jesoso bame eatani bale dipa bamehue piama. 17 Da cana dipa jacuaetini, bale, Jesosoa bamehue. Huada dipa cuaeme ea:

--Maesa. Ema da biyo pimimima. ¿Quetsio cata ja bale dipa ai bamehue poiobo? ¿Nimejono ai abai mahue sha? 18 ¿Pibama sha micana, toaiji bime dipa? ¿Pitsabajama sha, izajai bime dipa? Beta tseifñeme bepoa, laba tsaai tsio, yama laba eapo, ¿tso eiboeta sha? 19 Yama laba sico pezotao, sico mili (5000) tsedapo canaja padita pojo, ize epo po jepe cana ¿queocua ziqui meime lobiapehuiquibo micana?

Hua boanai cana dipa eahuiqui:

--Dose meime.

20 --Laba siete pezotao, cuatolo mili (4000) tsedapo canaja padita pojo, ¿queocua ziqui meime lobiapehuiquibo micana?

Da canaja eahuiqui:

--Siete.

21 --¿Yama dipa ai ea nimebani quepotso dyatsio micana? Laba betalimi canahua meo eani bime, yama da biyo pimimima --Jesoso eahuiqui.

*Toa ipatana po tata
toa izemeibo po biyo*

22 Jesoso, boanai cana nae lele Betsaeda cuaiñatibo. Ecuicha cana betaja toa ipatana po tata docuaiñaeme, Jesoso pejo.

--Itsobacuaeque --da canaja Jesoso cuaeti cuaeti ame ea.

23 Toa ipatana po tataja eme ifatso, Jesosoa lele tsahuao meaje ataiqui. Etoa detse cuichao cueditso, Jesosoa hua eme detse metse etoa lobosha. Dipa ahuiquitso, Jesosoa bicuaebajaiqui:

--¿Dyatsio tso mi ai queshama?



24 Eshoa dotsoatitso joda tata mimi:

--Tata cana basani. Acui cana batahue batame, eajeyoa bale.

25 Noahue isha Jesosoa eme detse metse toa lobosha. Dipa ahuiquibo isha atao, banetibo jaidya eatani. Toa izetanaibo. Bedada ai

abajai poanaibo. 26 Jesosoa joda tata hua etaezohue eilohuiquibo.

--Po-ejeibo bishapo pehue pomane. Lele Betsaedamo bashanaibo pipoma pomane --ea.

Jesoso tso ai tata ahuodi biyo

27 Tsio Jesoso boanai cana nae shipa deatiyoa, Sesalea Pilipo eohuo eani po lele cana pojojo pacuaiñatibo ezae. Poyoani tsio, Jesosoa dipa bicuaebajame ea:

--Tata cana ema biyo mimiani tsio, ¿ai tata ema pahuodi?

28 Boanai canaja cuaetaiqui:

--Jepe cana dipa mimihuodi, "Tata Joana ja, huidyimelelajai epo tata, idya isha eizeni isha ja". Jepe cana mimihuodi, "Tata Eliasa esi ja, idya isha eizeni isha ja". Jepe bale,



"Tadicatapoa jejeme cuaeji po tata, tata esi ja, idya isha eizeni isha", --ahuodi.

29 Datsio Jesosoa bicuaeabajaiqui:

--Bale micanamo, ¿ai tata ema, pohuodi?

Tata Pedeloa cuaetaiqui:

--Midya bale Quilito, Tadicatapoa ilota pohuemo tata.

30 Jesosoa dipa bitsanehue ea:

--Peisha po cana dipa cuaeme piahuiquima meaque.

*Peisha po canaja Jesoso
manoeme ataibo po biyo*

31 Tsio Jesosoa da cana eizedeameibo isha.

--Emamo ecuicha canaja bacue dea poi.

Bale tecata jibatseifetihuodi pehue da ema poiboani, peisha po canaja ane eatani pojo.

Tata esi, cuichacata poa, ema

paabapehuiquitaibo. Tadicatapo nae mimiji poi po canaja ema paabapehuiquitaibo. Ai izedeameiji cana dipahue. Da canaja bale ema manoemeibo. Dipa potseife quimisha potso bale, izeibo isha da ema poibo.

32 Dipa huada ajaicata cuaeme easha.

Diloti pipoma epo. Tata Pedeloa bale, Jesosoa bai ifaiquitso, dipa tsaneme ataiqui:

--Dipa mimime pipoma potame sahua.

33 Jabaleleatitso, boanaiji cana banetini tsio, Jesosoa tsanetaiqui tata Pedelo:

--Shipa pojaque. Satanasa batahue mi cuaeme eani. Ecuicha canaja nimejono metse pehue mi eani. Tadicatapoa nimejono metse pipoma.

Jesoso jo boanai poi po biyo

34 Tsio Jesosoa maiyashati po cana, boanai cana, joda pejo jejeiqui. Cuaeiqui:

--Quima boanai poi pojae po cana, hua apo emi poi pehue pipoma potso bale. Ema hua po pehue potso bale. Peishapo canaja manoemeibojae eatani tsio dipahue, ema nae eajeneti pehue potso bale. Potso bale etse bocuetso ajai pehue po. 35 Bale, ai se tsedapo, hua apo emi poi pehue potsomo, joda maesa pojaenaibo bishapo poi pehue. Etse po shili. Ai se tsedapo mo, bale, hua emimo iboetahuiquitso, ema hua po pehue podeaibo isha papoibo ezae, etse jaihue poi po. Potso bale etse jaidya po cueme Tadi najo pojanahuati lacua. 36 Bale ai se tsedapoamo, daocua cuahue eohuao ai huale cana jemibo atsomo, hua emi, hua shama, bale joyamehuiqui atsomo, ¿tso quejai? Mi moni. 37 ¿Ai ba etia cata etse, hua cuicha, hua shama, maesa pipoiboma papo pojo? Ai hualea cana metsemo apitsa pehue. 38 Bale dyatsio

apamo ecuicha cana Tadi metse pipoma. Poetihue.
 Masahue ahuodi. Joda canaja ema cuichao bisojae
 pehue. Yama cuaesahua po cana cuichao bisojae
 dipahue. Emamo bale eohua poshaobo isha tsio,
 joda cana cuichao bisojae pehue paposhaibo.
 Da ema poani. Ema ecuicha canaja bacue dea
 poi, bale pobeibo isha tsio, Tadicatapohuecata
 batame pobeibome papo. Tadia eatanhue po shama
 canaja, ajaicata po canaja ema bocueibo paata.

Capitolo 9

1 Ya mi daehuecata cuaesani:

--Tadicatapo ilome eanhuecata papoibo,
 cuichai poi cata lacua papoibo, eohuao. Micana
 jepe dipa bame papoibo, ize poani batso, datsio.



*Tadicatapoa Jesoso
bata pea mecuaeanati po biyo*

2 Sese (6) tseiñeme potso, Tata Jesoso, Pedelo nae, Jacobo nae, Joana nae eohua tiji tiji jalidyacata po mata beneje poti. Potsoatitso, matao cuaiñatibo. Joda cana pehue jodo neti epo. Tsio Tata Jesosoa cuicha bata pea poanati, hua boanal cana najo tsio. 3 Tata Jesosoa jaibal amaecata poanaibo. Amaecata lacua poanaibo. Ecuicha canajamo dipa locuame atoa piama. 4 Datsio, tata Eliasa esi, mano



epo po, tata Moise esi, mano epo po, jodo banetidyada ea. Huatseda atsono bepoa eohuao neti epo. Tadicatapoa lele jeneti jodo cuaifia. Tata Jesoso nae mimitsoatini, hua boanai canaja eba. 5 Pedeloa Jesoso dipa cuaeme ea:

--Dojoicatapo, cuada jidyoy, ajai. Cuama pahuatae quimisha aibotso bale ¿tso quejai? Peada midya poi, peada tata Moise poi, peada tata Eliasa poi.

6 Pedelo, Jacobo, Joana queolicata eme. Dipa poani batso, tata Pedelo ai ba mimime epo cata. Dipa poani batso Pedelo mimi: "Pahuatae aibotso ¿tso quejai?" 7 Tsio mozizi bade da cana biyo poana. Daeneti joda canaja etsoi dipa tsabajame eani:

--Joda quima bacue deacata. Joda nae ema aabacata batini. Da apopo bale mejifibajaque.

8 Dipa atso, hua boanai canaja toalelahuiquini tsio, Jesoso pehue neti eba. 9 Eohua tiji tiji mataeneti poboteiboani tsio, Jesosoa dipa cuaehuiquime ea:

--Jodo neti tsio baja po cana biyo picuaema meapasique. Ema ize cuaifiaibo ishao dada bale cuaemane. 10 Dipa cuaeme atso, hua boanai canaja joda tsidojoyoa pehue. Ize cuaifiaibo po biyo bale, tsi-ibobatihuodi epo. 11 Tsio joda canaja Jesoso dipa bicuaeabajame ea:

--¿Japotso ai izedeameiji canaja dipa
cuaeme ahuodi, "Eliasa ehuió papobe"?

12, 13 Huada cuaetaiqui:

--Damo Tadicatapoa jilica cuichao tso dipa
zehuime: "Tata Eliasa ehuió pobeiboani, ecuicha
cana Tadicatapo metse pameibo ezae." Potso dipa
pobea. Potso ecuicha canaja joda masahue
batani, masahue eatani. Tadicatapoa jejeme
cuaeiji po tata canaja tsonoda zehuime ea
batahue tso ata. Bale Tadicatapoa ilota po,
tata poi po cuichao ¿tso cuipa zehuime? "Joda
tecata batini papoibo. Ecuicha canaja joda
masahue shili pabaibo."

*Jatosaemetiji po shama
bade po todi biyo*

14 Boanai cana jepe najo cuaiñatibotso,
ecuicha cana apamo da cana hueleleneti
maiyaneti eba. Ai izedeameiji po beta boanai
cana nae pea jacuaecuaetini eba. 15 Maiyaneti
po canaja Jesoso banetitso, nimetioba ea.
Jesoso najo jododoibo, "midya sha" batahue
paacuae ezae. 16 Jesosoa da cana
bicuaebajataiqui:

--¿Ai biyo tso cuaetini quia boanai cana
nae?

17 Maiyaneti po cana poeneti po tata
peadaja cuaetaiqui:

--Izedeameiji, quia todi ya dobeani midya najo, midya jaihue pameibo pojo, mimibai mahue metani po shama bade poani batso. 18 Shamaja joda locuilocuiahuodi, eohuao tajajaemehuodi. Dipa poani tsio hua cuatsae bojo apamo poanani. Hua etse "dadadadada" ahuodi. Da a aihue jashatanapehuodi. Yama mique boanai cana cuaeiqui: "Joda meiyamehuiquiboque." Da canaja bale dipa aibotoa pipoma.

19 Tata Jesosoa cuaetaiqui:

--Jm, tsi-a piama ahuodi po cana, micana nae poibo poi bea quetsono ema poani. Bea cuipa cata ja pehue. Joda todi jetiboque.

20 Ataibojo, naedaja todi jetibo. Jesoso najo dobea. Masahue po shamaja Jesoso bani mepaihuecata tsio, todi locuilocuiameibo.



Todi eohuao bo0 potso balele, balele pohnodi.

Dipa poani tsio cuatsae bojo apamo poanani.

21 Jesosoa todia tadi bicuaebajataiqui:

--¿Quetsono tso dia potsane epo?

Tadia cuaetaiqui:

--Ezoehuelipi tsio dipa potsane. 22 Huada joda cuatichojo ahuiquihuodi, ena tipae dipahue, da maesa pameibo ezae. Midya bale ai aibotoa poani potsomo, cuama, "aliso quia poani", aque, cuama atsahuaiboque.

23 Jesosoa cuaetaiqui:

--"Aibotoa poani potsomo." Jm, dipa piama aque. Yama dipa aibotoa jabatimehuehuodi po cana poi yama daocua cuahue ai meaibotoa..

24 Tsiohue da todia tadi bicuiziacata cuaetaiqui:

--Dipa jabatimehue yama. Bale ema atsahuaque, ado-eje masha jabatimehuodi papoibo pojo.

25 Tata Jesosoa, ecuicha cana tamomoneti popoda poani baibotso, masahue po shama dipa jado-ejetitso cuaeme ataiqui:

--Mimibai mahue poi po, tsabajabai mahue poi po shama, da meiyahuiquibahue aque.

26 Tsitsia potso, shamaja todia jajojiquitso jejajaemeibo. Aibotso, meiyahuiquibo. Todi manoetiba po batahue batame batso, jepeahue mimi:



--Tso manoetiba.

27 Tata Jesosoa bale hua meatsao iñatso, eishatsoaibo. Dipa ataibojo, netianaibo.

28 Etaezo nobibotso, tata Jesoso, hua boanai cana pehue eani tsio, hua boanai canaja bicuaebajataiqui:

--¿Cuipatso cuamaja joda shama meiyamehuiquibotoa pipoma?

29 Tata Jesosoa ecuae:

--Tadicatapo nae eshoi mimibotso bale.
Dipa pipoma pojomo, meiyamehuiquibotoa pipoma.

*Peisha po canaja
Jesoso manoemeibo po biyo*

30 Daeneti Jesoso, hua boanai cana nae poanaibo. Calilea eohuao po-ejeibo bishapo pehue poani. Peisha po canaja Jesoso dipa poani, pitsabajama atajae Jesoso batini epo.
31 Huada hua boanai cana izedeamehuodi jabatitso, dipa tsi poti pehue pojae. Huada dipa cuaeme ahuodi ea:

--Ema ecuicha canaja bacue dea poi.
Tadicatapoa ecuicha cana ema patipasi. Joda canaja ema pamanoemetaibo. Maesa potseñe quimisha potso izeibo isha, da ema poiboani.

32 Dipa cuaeme ataibojo bale, hua boanai canaja dipa ea:

--Japo ja dia poanicata.

Joda bicuaebajaibo piama bale, queoli poi pojae batani batso.

Ai tata peasocata masha po biyo

33 Joda cana Capenoma leleo cuaiñatibo. Etaezo neti tsio, Jesosoa hua boanai cana bicuaebaja:

--¿Cuipa po biyo tso cuaetini dizia poyoa tsio?

34 Bale joda cana beneti pehue, dizia poyoa tsio peaja jacuaecuaeti pohnodi batso. Ai se peasocata masha po biyo cuaetini epo, daocua cuahue peasocata poi pojaehuehuodi poani



batso. 35 Anibotso, Jesosoa hua boanaicata po dose po cuaeiqui:

--Pasopojomo mi pobeapasitame.

Joda pejo tsio, huada dipa cuaeme ea:

--Cuichacata poi pojae po cana tiacata poi potaibome sahua. Cuichacata poi pojae po cana, peisha po canaja eiloi poi potaibome sahua.

36 Tsio, Jesosoa dahuehue neti po todilipi boanai cana dojojo dojotaiqui. Joda izamiquini tsio dipa eahuiqui:

37 --Micana, ema nae aaba poani batso, todilipi, ojo batahue po, atsahuaibo atsomo, ema eatsahuaiboani po batahue. Da quia midya shodi atsahua huodi. Ema eatsahuaibo atsomo ema pehuemo eatsahuaiboani pipoma. Tsiohucata Tadicatapo dipahue isha eatsahuaiboani.

*Ai tsedapo bale cuada atsahuaiboani
po biyo*

38 Tsio tata Joanaja Jesoso cuaetaiqui:

--Bahuicuaeji, bea ai tataja masahue po shama cana meiyamehuiquihuodi cuama baiqui. Joda tata, "ema Jesosoa metse poani", cuaeme eatani tsio, shama cana meiyamehuiquilelajai. Pejo po tata pome batso, "dipa piama aque", cuadaja cuaeiqui.

39 Bale Jesosoa cuaeta:

--Dipa piama atame sahua. Pishehuima atame sahua. Ai tataja "ema Jesoso metse poani" cuaeme eatani tsio, ai nimetiobai po aibotsomo, behuehue ema biyo mimi isi potoa pipoma posha. Pejo poa bime ajai ahuodi. 40 Ai tataja cuada doda tsiba pipoma potsomo, huada cuada atsahuahuodi. 41 Daehuecata cuaesani ya micana, ai tataja micana eohui pehue tibo ataomo, pameizita pojo, micana quima boanai cana batso pojo, Tadicatapoa joda ai patia. Dipa atsahuame meatani batso pojo, Tadicatapoa ai patia.

Masahue mehuodi po cana biyo

42 --Ai tatajamo ai ema metse po todilipi neti isi poi pohue cuaemeibo atsomo, ajenicata cueme joda shilimo. Dipa piama tsio, majana ajalili nalao ijitso, manonao adoetojo jihuiquimeanatao bale ajai masha jodamo. 43 Miqueda eme metse midya ai masahue easha atsomo, seohuiquique. Me peadahue bime dipa, etse Tadicatapo najo neti janahuati etse po lacua. Me betacata tatse bime, cuati leleo pehue neti janahuati etse po shili. 45 Miqueda huatsi metse midya ai masahue easha atsomo, seohuiquique. Huatsi peadahue bime dipa, etse Tadicatapo najo neti janahuati, etse po lacua.

Bale huatsi betacata tatse bime, cuati leleo
pehue neti janahuati, etse polelajai po shili.

47 Miqueda etoa metse midya masahue
atsanetsomo, bocahuiquique. Toa peadahue bime,
etse Tadicatapo eametani po najo neti janahuati
pome po lacua. Bale atoajai tatse bime, cuati
leleo pehue neti janahuati etse po shililipi.

48 Cuati leleo, tsojoa ajanahuati mata mahue
etse po o. Ai mo eotsohueya apitsa.

49, 50 Sao ajai. Saohua jana eami ajai masha
ditame, eihui poi pipoma melelajai. Micana sao
ajaicata po batahue papoibo bale, ema tsi-a
pehue potsomo, nime isi poi pojae po cana
bani tsio bime. Sao batahue po ecuicha canaja
jepe cana ajai masha netime melelajai. Sao
masatibo potsomo, ai maesa poi pehue tso ea.

Capitolo 10

*Huane, eahue meiyahuiquibo
alelashili po biyo*

1 Netitsoatso, Jesoso daeneti pojaenaibo.
Jodea eohua petoanatso, mano Jodana petoanaibo.
Mano shipa noahue isha ecuicha canaja apamo
Jesoso bashatihuodi. Jesoso najohuodi maiyanet
pohuodi. Jesosoa noahue izedeameibo isha,
alelajai po isha batahue. 2 Beta paliseo

Jesoso najo cuaiñaibo. Jesoso ai daehue poi pipoma pameibo ezae, dipa bicuaebajame shili ataiqui:

--Tataja hua huane pohue meiyahuiquibo poa alelajai ¿tso quejai midya bame eani?

3 Jesosoa bicuaebajata:

--Da biyo tata Moisea micana ¿cuipatso cuaeme atana?

4 Da canaja cuaetaiqui:

--Tata Moisea dipa ea: "Meiyahuiquiboani po biyo jilica zehuibo atsono, miqueda mama ilohuiquibo ahue."

5 Jesosoa bale dipa ea:

--Micana izedeatajae pipoma batso pojo, tata Moisea dipa zehuime atana. Dipa po cana bale Tadicatapoa alelajai pipoma.

6 Tsonodacatapomo, ai eimeatsanebetsotani tsio Tadicatapoa ecuichamo, dea, pona imeame ata.

7 Dipa batso pojo aiyaja tata hua huadi hua tadi meiyadeashahuiña. 8 Dipa poanatsa mama jemiqui. Peadahue emi poi batahue Tadicatapoa eametani batso joda dojo janahuati.

9 Tadicatapoa tso peleti eame po detse ai tataja meiyahuiquibojae piama atso bale.

10 Etaezo noahue nobibo isha tso, boanai canaja joda biyo bicuaebajaibo. 11 Jesosoa cuaetaiqui:

--Ai se tataja bale, hua huane pohue meiyahuiquibo atsono, mama peisha po jemiquideibo isha atsono, mosojo bicue bade pehue potso bale, dipa masahue batso.

12 Mamajamo eahue pohue meiyahuiquibo atsono, peisha po tata jemiquibo isha atsono dipahue isha mosojo bicue bade pehue potso bale, dipa masahue poi pojo.

*Todi canaja Jesoso bashao
jaipihue epo biyo*

13 Tsio ecuicha canaja mochacho cana Jesoso najo docuaiñatsaneibo, Jesoso pa-itsobata pojo. Jesoso boanai canaja bale, joda cana dipa tsanehuiquime ea:

--Dipa piama atame sahua.

14 Dipa eatani batso, Jesoso azai. Boanai cana cuaeiqui:

--Todi cana ema bashao jaipihue. Dipa joda cana potso bale. Pishehuima atame sahua. Tadicatapo eametani po najo, da batahue po ecuicha cana nobiji poihue. 15 Daehuecata cuaesani ya mi, ai se tata Tadicatapo eametani po najo netijae potsomo, todi poicata jabatimehue potso bale. Dipa poani jabatimehue pipoma potsomo, nobiji poi pipoma.



16 Tsio Jesosoa todi cana meizamiquia eatsaneibo. Eizamiquini tsio, shoa eitsobani tsio, dipa cuaeme ahuiquihuodi:

--Tadicatapoa shodi midya ize memasha paataibo.

Ai tipao poi po cana biyo

17 Datsio Tata Jesoso daeneti pojaenatibo. Pojaenaiboani tsio, pejo po tata jododotitso, Jesoso bajajo. Jesoso botseo eaniboteani tsio, cuaeta:

--Ai Izedeameijipo, Ajaicatapo, ¿cuipa potso ema neti janahuati lacua poibo?

18 Jesosoa cuaeiqui:

--¿Japotso, "Ajaicatapo", tso ema mi eashani? Tadicatapo pehue ajaicata. Jico pea ai se ajaicata pipoma. 19 Bale Tadicatapoa tsonoda ecuae po cana midya dipa bamehuemo, "Pea ecuicha maesa piama poque. Peisha poa pohue mama mejemishaibo piama aque. Ai tsiji piama aque. Dipa noshi sipame pipoma poque. Mique tadi, huadi ajaicata bataque."

20 Ai tipao po cuaetaiqui:

--Ai Izedeameijipo, da cana cuichao dipa pohue poi acuaetajai da ema. Esi poi poani tsio dipa potsane.

21 Joda banetini tsio, Jesoso amosone.

--Peadamo di piaibomahue midyamo. Mique ai huale cana shipa tihuiquipeiboque. Ai mejemiquitso da poi, shipa tihuiquique. Ai mahue polelajai po ecuicha cana tipeiboque. Midya dipa aibojo bale, miqueda poi ai huale cana ajaicata Tadicatapoa leleo eani poani.

Dipa aibotso, pobeaque. Ema boanaque --ea sahua.

22 Dipa jatsabajatitso bale, joda tata tso peati poanaibo. Tsio noahue ponaibo isha, eoli batini, ai tipao jabatitso. 23 Jabaleleatitso, Tata Jesosoa hua boanai cana eahuiqui:

--Tadia eametani po najo, aijicata po canamo, ¿cuipa ba nobime epocata? Nobiji jaidya pipoma.

24 Hua boanai canaja joda cuaeta po biyo nimetioba eatani. Bale Jesosoa noahue isha eahuiqui:

--Mamazaolipi cana, ai huale canaja eatsahuatani jabatime po cana Tadicatapoa eametani po najo nobi jaipi poi pipoma.

25 Camelo biyo nimebaque. Da bale huaeni ahuada biyo. Camelomo shopili lalaomo nobitoa apodahue polelajai cuichiji. Aijicata po tata Tadicatapoa eametani po najo cuaeso dipahue isha po cuae, nobi isicata.

26 Da cana datsio nimetioba cueme ahuodi. Tsio bicuaebajataiqui:

--Dipa batso pojo ¿ai se bale cata ja ize janahuati lacua poibo?

27 Da cana banetini tsio, Jesosoa ecuae:

--Ecuicha pehue potsomo ize janahuatitao pipoma. Tadicatapo nae potso bale pehue izeneti janahuati lacua etse poi po.

28 Tsio Pedeloa Jesoso cuaeta:

--Bale, cuamajamo daocua cuahue ai eanicha po canamo tso meiyapehuiuiba, midya paboana ezae.

29 Jesoso mimi:

--Daehuecata cuaesani ya micana, aiyaja, ema nae aaba poani batso, ajaicata po cuaeme ea po cana jaidya batani batso, hua etae, hua mamazao cana, dodo cana, huadi, tadi, todi cana, teje cana meiyahuiquitaibojomo, 30 apamo masha netica papoibo. Da cana meiyahuiquitaibojo bale, Tadicatapoa apamo masha etae cana, mamazao cana, dodo cana, huadi cana, todi cana, teje cana patitaibo, dyatsio, joda ehuao neti tsio. Pejo po canaja bale neda pehue eatani papoibo. Becata bale Tadicatapo najo netijanahuati lacua poanimo. 31 Bale apamo ehuiio poi batahue polelajai po cana tiacata poi papoibo. Apamo tiacata polelajai po cana bale dya isha ehuiio poi papoibo.

Ecuicha canaja Jesoso dipa paa po biyo

32 Tsio joda cana dizia poshahuiñaiboani isha, Jelosalene leleo pacuáiñatibo ezae. Jesoso ehuiio masha poyoa. Jesoso Jelosalene beneje ponaiboani batso, hua boanai canamo

nimetiobatani. Tiacata poyoa po cana queoli epo. Tsio Jesosoa hua boanaicata po cana, dose po, cuae:

--Dizi pejo mepobeapasiboque, tata canaja ema dipa paataibo po biyo ya micana pacuaeibo ezae.

33 Dizi pejo neti tsio, Jesosoa dipa cuaeme ea:

--Jiñebaja jaidya aque. Cuada Jelosalene pacuaiñatibo. Tataja ema, tata poi po, timehiquitaibojo, cuichacata po mimiji poi po canaja, ai izedeameiji canaja ema jeotaibo. Joda canaja, "Jesoso manoemeiboque mae" cuaehiquime paa. Atso ema shipa tidyeaibo, tsejono pea po canaja ema pamanoemetaibo pojo.

34 Joda canaja ema pamasabata. Ema cuichao pacuedi. Ema pacuisolijita. Dipa eshoi apetso, ema pamanoemetaibo. Maesa potseñe quimisha potso, ize cuaiñaibo isha da ema poiboani.

*Tata Jacobo, tata Joana
cuichacata poi pojae po biyo*

35 Datsio tata Zebedea bacua detse, Jacobo, Joana, Jesoso cuaejajobo:

--Ai Izedeameiji, pasopojomo, mi tsema poi ai mecuaeibo.

36 Huada tsio bicuaeabajataiqui:

--¿Ai bale ja yama metseda poi mecuaeibo?

37 Huatseada eahuiqui:

--Dipa tsema cuaeme aque, "Ema botse pejuhucata ani jaipihue metseda potso bale, yama eameani tsio".

38 Bale Jesosoa eahuiqui:

--Yama eaibo bani po biyo dipa bamehue pipoma metseada. Ema ane bani pehue papoibo. Ema tecata batini papoibo. ¿Metseda dipa poi pomane quepotso zai? Ema huidyiboani po batahue papoibo. ¿Metseda dipa poi pomane quepotso zai?

39 Huatseada cuaetaiqui:

--Tsema dipa poihue poi.

Tsio Jesosoa cuaeiqui:

--Metseada ane bani pehue papoibo, damo. Huidyiboani po batahue papoibo, damo. 40 Bale ai se tatamo ema pejuhue cata anijaipihue yamamo dipa cuaeme amane pipoma. Tadicatapoa pehue joda anilele cana eimepe. Tadicatapoa dipa cuaeme paa.

41 Dipa jatsabajati mepotso bale hua boanaicata po jepe Jacobo nae, Joana nae, azai.

42 Boanai cana jejeiquitso, Jesosoa eahuiqui:

--Jepe canaja eilotanio po cana eilohuiquihue shili. Jepe canaja cuichacata po cana ame polelajai. Dipa bamehue micana.

43 Bale micanamo dipa pipoma. Bale ai se tatamo micana dojojo cuichacata po poi pojae poi poshatsomo, micanaja po eiloi poi pehue

potame sahua. 44 Ai se mo eilotanio pojae poi
 poshatsomo, peisha po canaja po eiloi poi pehue
 potame sahua. 45 Emamo, tata poi po bime dipa,
 eilohue eatanlohue papo ezae pobeas pipoma.
 Eiloi poi papo ezae pobeas. Apamo canaja poi
 pamemanoibo ezae pobeas, joda cana ijinetitso
 batahue pipoma papo pojo, eajeneti poi bale
 pamepo pojo.

*Toa ipatana po,
 ai bicuaeba bishapo pehue po
 tata biyo*

46 Lele Jelico cuaiñatibo. Jesoso boanai
 cana nae, apamo peisha po cana nae daeneti
 ponaiboani tsio, toa ipatana po tata dizi pejo
 eani epo. Tata Batimeo epo, tata Timeoa bacue
 dea. Toa ipatana jabatitso, ai modoi poi
 pipoma, ai bicuaeba bishapo pehue. 47 Jesoso,
 lele Nazale netiji epopo, jodae poyoa
 tsabajatso, huada dipa jejeiquime ea:

--Jesoso, tata Dabidaja bacue dea, ema
 alidyaso poani baque.

48 Apamo canaja bale tsanetaiqui:

--Tsiani pehue poque.

Huada bale shipae masha jejeiquime ea:

--Tata Dabidaja bacue dea, ema alidyaso
 poani baque.

49 Jesoso neti netitso, mimi:

--Joda mejejeiquique.

Atao naedaja dipa jejeiquime ea:

--Mosojo jojidy poque. Netianaque.

Jesoso midya "pobeaque" eatani.

50 Aboa poi po masha bocahuiquitso,
netianapodatso, Jesoso beneje jododonaibo.

51 Tsio Jesoso joda bicuaebaja:

--¿Cuipa bale ja yama midya poi ameibo?

Toa ipatana po tata cuaetaiqui:

--Dojoi, quima etoa midya izemeibo pacata
batini.

52 Jesoso ecuae:

--Ponaibomane. Midya yama eatsahuani
jabatimehue poani batso yama mique etoa
izecuaifñanaemeibo.

Eatani mepahue, toa izecuaifñaiibo.
Potso joda tata Tata Jesoso dizia
bocueshahuiñaiibo.

Capitolo 11

*Jesoso cuichacata po batahue batame
Jelosalene leleo cuaiñatiboani po biyo*

1 Jadeatibotso, lele Betapaje, lele
Betania cuaiñatiboani epo. Da lelelimi detse
lele Jelosalene jacuepati epo. Jodo eohua
tijitiji jalidyapo epo. Da cuichao Olibo acui

cana poneti epo. Joda batadae poani tsio,
Jesosa boanai detse ilohuiquitaiqui, molazoe
pajeanaata pojo. 2 Eshoi huada cuaeiqui:

--Batadao pojojo leleo cuaiñanatique.

Cuaiñatiboani tsiohue molazoe jodo eijineti
metse bani. Da bebacuaomo ai se planibama.
Pisoibotsohue, dobeiboque. 3 "¿Cuipa bame atso
da pisoiboani?" aiyaja metseda ataomo,



cuaeiboque, "Dojoicatapo da dojopasijae eatani. Behuehue da iloshaobo."

4 Potitso, molazoe tejeticaiqui. Dizi etae pejeje eijineti epo. Pisoiqui. 5 Do neticha po tata canaja bicuaebajataiqui:

--¿Cuipa bame atso molazoe pisoiquini?

6 Tsio boanai detsea do neticha po cana tata Jesosoa cuaeta po cuaetaiqui. Dipa cuaetaibojo:

--Jaa, medonaiboque --ea.

7 Huatseada Jesoso neti pojojo molazoe dojocuaiñatibo. Hua jaibai jepe molazoe bebacuao ishatao, Jesoso da biyo aniquibotso, poti. 8 Apamo ecuicha cana datsio hua jaibai aboa poi po dizia badeape. Jepe acuisha cana tomi iña batahue po tejeo seotso dizia badeape. Tata Jesoso ajaicata bani batso dia ea.

9 Ehuio poani po cana, tiacata po cana dipahue dipa bicuiziacata eatani epo:

--Ajailacua. Tadicatapoa ilohuiquita po ajaicata. 10 Cuicha poi po tata papoibo, tsonoda neti epo po tata Dabida batahue. Tadicatapoa joda eatsahuahuehuodi.

11 Jesoso Jelosalene cuaiñatibotso, Tadicatapoa etaecata nobibo. Daocua cuahue jodo ai cana babale. Eaponani batso, babale pehue atso, poti, boanai dose po nae, lele Betania pacuaiñatibo ezae.



Jajai poi pipoma po acui biyo

12 Hueno lele Betania jeneti ponaibo isha tsio tata Jesoso aidyijae poana. 13 Aocue masha poneti po iquela acui banetitso, da banatibo, jajai quepotso paba ezae. Pejeje neti tsio jaja mahue eba. Esha pehue, datsiomo jajai pipoma polelajai pojo. 14 Tsio Jesosoa iquela acui cuaetaiqui:

--Tsedapoa miqueda jaja cana dibo isha pipoma poani, jajai poi poibo isha pipoma pojo. Hua boanai cana joda tsabajataiqui.



*Tadicatapoa etaecata po
aimo cana poi pipoma po biyo*

15 Lele Jelosalene cuaiñatibo.

Tadicatapoa etaecata po pejehueleiyó ai shipa
cuaebajahuodi po cana Jesosoa ponamehuiquibo.
Jodo diñelo cuaebajahuodi po canaja shapapa cana
Jesosoa zotoahuiquibo. Huai cana shipa
cuaebajahuodi po canaja eaniji cana
zotoahuiquibo. 16 Jodo ai huale cana dojtani
po cana huada dipa ahueyamehuiqui ea. 17 Tsio
huada da cana mipa izedeibome ea:

--Tadicatapoa ecuae po tso dipa zehuime
ea cuichiji, "Quima etae tsedapo misiohuaja
poi, ema nae pamimibo ezae". Micanajamo bale
ai tsijiji poa lele poi tso ea.



18 Cuichacata po Tadicatapo nae mimiji poi po canaja, ai izedeameiji canaja, da tsabajatso, dipa eatani epo:

--¿Cuipatso joda isheibome a?

Jesoso biyo queoli poani epo bale, ecuicha cana daocua cuajahue Jesosoa ecuae po cana biyo nimetiobatani batso.

Acui shobibipe po biyo

19 Eaponani tsio Jesoso, boanai cana nae, da lele jalidya jeneti poanaibo. 20 Hueno dada iquela acui batadao poani tsio da shobibipe baneti. 21 Tata Jesoso huetseifeo cuaesata po nimebaibo isha tso, tata Pedeloa Jesoso cuaetaiqui:

--Dojoicatapo bahuiquique. Midya tsanea po acui tso shobibipeibo.

22 Jesosoa da cana cuaetaiqui:

--Tadicatapoa dipa ai aibotoa bamehuehuodi potame sahua. 23 Daehuecata ya mi cuaesani, aiyajamo Tadicatapo bicuaebajataibojomo, joda eohua tijitiji ajalili po tseifienao jihuiqui paata pojo, Tadicatapoa dipa paaibo, Tadicatapoa dipa eataiboani huada jabatimehue pojomo.

24 Dipa batso ya mi cuaesani, Tadicatapo ai bicuaebajani tsio midya da jemiboani jabatimehue potsomo, da jemiquibo. 25 Tadicatapo nae mimini tsio, ai se nae adojo, azai potsomo, da

nae eshoi jaidya mehuiquibotso bale. Huada ane ea po cana eshoi iboetahuiquitso bale. Dipa aibojomo, miqueda Tadi, bacueo po neti po Tadi, dipahue miqueda masahue ea po cana iboetaibohue isha poibo.

Jiquea po Jesoso ilota po biyo

27 Tsio noahue isha lele Jelosalene cuaiñaibo. Tadicatapoa etae pejehueleiye eajeiboani tsio, cuichacata po mimiji poi po cana, ai izedeameiji cana, cuichacata po esi cana, Jesoso najo cuaiñaibo. 28 Joda canaja Jesoso bicuaebajataiqui:

--¿Jiquea tataja tso mi "dipa aque" eatani?
¿Aiyaja tso mi dipa metani?

29 Tata Jesosoa cuaetaiqui:

--Yama micana ai pabicuaebajaibo eshoi.
Ema micanaja da cuaeibojomo, yama micana aiyaja ema dipa aque eatani po pacuaeibo.

30 ¿Jiqueatso bale ja tata Joana ilota, ecuicha cana pahuidyiamepasita pojo? ¿Tadicatapoamo?
¿Tata canajamo? ¿Quea balea tso?

31 Da canaja bale dipa cuaecuaetini epo:

--"Tadicatapoa ilota," cuada da cuaeibome ajaomo, huada cuada pabicuaebajaibo isha:

"Dipa pojomo, ¿culpa pojo micanaja da

pitsiama?" 32 "Tata canaja ilota," cuada

cuaeibome ajaomo, apamo naeda cuada nae adojo

poiboani, tata Joana Tadicatapoa jejeme cuaeji po tata jabatimehue poani pojo.

33 Batso, da canaja Jesoso cuaetaiqui:

--Bea culpa. Da biyo dipa bamehue pipoma.

Dipa atao Jesosoa cuaetaiqui:

--Yama dipahue ema eilotani po biyo ai picuaema isha poani.

Capitolo 12

Teje mebahuodi po cana biyo

1 Tsio Jesosoa nimebaiqui bishapo pehue po metse dipa bahuicuaeibo ea:

--Peada tataja teje nojaichatso, oba jono, jono ajaicata po banata. Da huelebaleleataiqui, da papeyoneti pojo, naedaja pitsijima paata pojo, huaenia pitsijima paata pojo. Majana jalidya cuichao tocuaza ea, jajana papodoeme ezae. Bacueo shataca aato ea, pabiabataneti pojo.

Tsio huada peisha po cana cuaeta, "Ema peisha po eohuao panetidyaeibo beo. Quima teje quia mi mebajapasitame, quia poi. Miqueda poi jaja cana jepe aque." Dipa aibotso da potibo.

2 Atsono potso, jono jajai poibotso, teje poi tataja hua eiloi eilohuiquibo, mebahuodi po cana pabanatica pojo, jaja cana jepe pajetica pojo. 3 Cuaifiatibojo bale teje mebahuodi po

canaja da ishetaiqui. Ai mejuhue ilohuiquitaiqui pehue. 4 Becata teje poi po tataja peisha po eiloi ilohuiquibo isha. Da canaja bale shoa-isheta. Masahue pehue ata. 5 Peisha po ilohuiquicao, manoemeta. Apamo dipa ilohuiquicao, jepe isheta, jepe manoemeta. 6 Tata peada isha bale joda nae epo, hua bacue dealipi. "Da canaja quia bacue dea bale iyoda pabaibo," huada nime ebaibo. Dipa atso da ilohuiquibo. 7 Bale teje mebahuodi po canaja dipa cuaecuaeti ea: "Da po bale teje poi papoibo. Cuada joda isheibo. Da isheibotso, teje cuadaja metse papoibo." 8 Dipa atso joda ifiatso, manoemetaiqui. Hua emei teje shipa jihuiquitaiqui.

9 Dipa atao, teje poi po tataja ¿cuipatso paaibo? Tejeo cuaiñatini tsio, huada teje mebahuodi shili po cana maesa paaibo. Dipa atso, peisha po cana, "quia teje quia mi mebjapasitame sahua," paaibo. 10 Tadicatapoa jilica dipa cuaehuodi po micana bamehuehuodi.

Majana etae eatani po cana dipa cuaeme ea, "joda majana, etae poi, masahue".

Dipa atso joda jihuiquibo ea. Bale joda jihuiqui po majana ajai epo. Bedada da etae poi po majana cuichacata po poi.

11 Dipa Tadicatapoa, Dojoicatapoa ea.
Da batso cuada nimetioba.

12 Tsio da leleo neti po cuichacata po canaja Jesoso ifñaibojae pa-ishe ezae, huada tsaneatani batso. Peisha po cana da biyo adojo poibo pojo bale, ai piama. Jesoso meyaibotso ponaibo bishapo.

Ahuaba bishapo pehue shili cana biyo

13 Dipa potso, naedaja paliseo cana beta, tata Jelodea bocuei cana beta ilohuiquita, Jesoso ai masahue mimime pameta pojo.

14 Jesoso najo cuaiñaibotso da canaja cuaetaiqui:

--Bahuicuaeiji, midya daehuecata. Midya tata cana daocua cuahue dipahuecata bahuodi. Cuichacata po cana, tiacatalipi cana dipahuecata bahuodi. Tadicatapoa alelajai cana midya daehuecata bahuicuaehuodi. Dipa bamehue cuama. Cuadaja neti metse po tata, tata Sesa, difelo tihuodi alelajai po, ¿tso ajai quepo?

15 ¿Cuadaja dipa alelajai atso, ajai quepotso zai?

Bale da canaja dipa noshi eatani pehue, Jesosoa bamehue ea. Dipa batso cuaeiqui:

--¿Cuipa pojo micana ema dipa ahuabahuodi shili? Pelolo po difelo peada dobeiboque, yama paba pojo.

16 Da dobeibojo, Jesusoa bicuaebajataiqui:

--¿Aiyaja tso shamabai da cuichao eani?

¿Aiyaja tso banimo da cuichao eisha?

Naedaja cuaetaiqui:

--Tata Sesaja shamabai, banimo.

17 Jesusoa cuaeta:

--Tata Sesaja ai cana tata Sesa metiboque.

Tadicatapoa ai cana Tadicatapo metiboque.

Da tsabajatso, naeda nimetioba ea.



*Mano epo po tsedapo cana
noahue isha eizeneti isha poani po biyo*

18 Tsio sadoso cana beta cuaiña. Sadoso canaja mano epo po cana noahue isha eizeneti isha pipoiboma poani bame. Da canaja dipa cuaeme ea:

19 --Bahuicuaeiji, tata Moisea cuadaja poi dipa zehuita, "tata manoibotsomo, huada huane bacua mahue potsomo, hua mamazaohua joda mama jemiquitso bale, mochacho cana pameataibo pojo, manoibo poa poi". 20 Bale mamazaocata siete neti epo. Ehuio poa mama jemiquibo ea. Bacua mahue tsio da tata manoibo. 21 Dipa batso hua mamazao esi masha po da mama jemiquicaibo. Da dipahue isha bacua mahuehue tsio manoibo. Da bisha hua mamazao esi masha po dipahue isha ea. 22 Hua mamazao daocuahue dia pope. Bacua cana piama bale. Da tata cana manopeibojo, mama dipahue isha manoibo. 23 Becata da cana noahue isha eizeneti isha tsio, ¿da mama aiyaja metse papoibo? siete tataja jemisata batso.

24 Jesosoa cuaeta:

--¿Cuipa batso micana dipa nimeba isi ahuodi? Tadicatapoa jilica dipa bamehuehuodi pipoma batso pojo. Tadicatapo ajoji bamehue pipoma batso. 25 Ecuicha cana noahue isha eizeneti isha tsio, Tadicatapoa leleo neti tsio,

tataja mama jemihuodi alelajai pipoma poani.
 Mamaja tata jemihuodi alelajai pipoma poani.
 Tadicatapoa eiloi shama cana batahue netime
 papoibo. 26 Bale micana mano epo po noahue
 isha eizeneti isha poani po biyo ema
 bicuaebajahuodi, ¿damo? Tata Moise zehuita po,
 acui huamolimi biyo po ¿pibama sha ja micana?
 Datsio Tadicatapoa Moise dipa cuaeme ata, "Ema
 tata Abamaja, tata Isacaja, tata Jacoboa
 Tadicatapo". 27 Da cana tsonodacata manoana
 pohue dipa Tadicatapoa dipa cuaeme ea. Da cana
 maesa popecata pojomo, Tadicatapoa dipa cuaeme
 piama atame po dipa. Da cana bale eizeani.
 Micana mano epo po cana biyo cuaeni noshi eani.

Tadicatapoa ecuae po cuichacata po biyo

28 Ai izedeameiji po tata cuaiñaibotso,
 da cana cuipatso jacuaetini tsabajame ea. Tata
 Jesoso ajaicata cuaetame eba. Tsio huada
 Jesoso dipa bicuaebajame ea:

--¿Tadicatapoa ecuae po que bale tso
 cuichacata po?

29 Tata Jesosoa cuaetaiqui:

--Cuichacata po dipa: "Metsabajaque,
 Israeli cana. Tadicatapomo da pehue Dojoicatapo.
 Co pea dipahue isha ai pipoma. 30 Miqueda
 Dojoicatapo Tadi da abahuodi lacua baiboque.



Janimeiquitso aaba baiboque. Dia pibama abada baiboque." 31 Tadicatapoa ecuae po peisha po cuichacata po dipa: "Midya batini batahue isha, naeda abada baiboque." Co pea ecuae po cuichacata masha poi po tsaai.

32 Ai izedeameijia Jesoso cuaetaiqui:

--Damo, Bahuicuaeiji, midya Tadicatapo biyo daehuecata mimime poani. Tadicatapomo, da pehue dojoicatapo. Co pea dipahue isha ai pipoma. 33 Da abahuodi lacua potso bale. Joda janimeiquitso abada baibotso bale. Joda dia pibama abada baibotso bale. Dipahue isha, naeda abada baibotso bale, jo batini isha batahue.

Da bale daehuecata, ajaicata. Ai cana cuahui Tadicatapoa poi, ai manoemeibo Tadicatapoa poi bale cuaesocata pehue. Dipa bamehue yama.

34 Huada cuaeibo jaidya ataiqui batso, Tata Jesosoa cuaeta:

--Midya Tadicatapo metse poi pojae.

Dipa atao daocua cuajahue Jesoso ai bicuaebajajae isha piama.

Tata Jesoso Dojoicatapo biyo

35 Becata Tadicatapoa etaezo Jesosoa dipa bahuicuaeme ea:

--¿Cuipa bame atso ai izedeameiji canaja dipa eatanihuodi: "Quilito tata Dabidaja otse pehue"? 36 Tata Dabidamo dipa mimime epo:

"Tadicatapoa Dojoicatapo cuaeta, 'Ema pejo animane. Midya masahue batanihuodi po cana yama palipia poi paahuiquibo'." Tadicatapoa shama ajailacua po dipa mepotia cuaeme ea.

37 Tata Dabidamo joda "Dojoicata", banimo ahuodi potsomo, hua otse pehue ¿quepotso ja? Maesa.

Jodo dohuodi po ecuicha canaja Jesoso tsabajajae batini epo.

*Peasocata noshi pehue pojae po
ai izedeameiji cana biyo*

38 Dipa bahuicuaehuodi tsio Jesosoa dipa
ea:

--Jepe ai izedeameiji cana piboanama
atso bale. Da canaja jaibai pea, abao po,
jaibalelajai, naeda da peasocata bame paata
pojo. Da cana, ai cuaebaja leleo tsio, naedaja
da ajaicata batani pojae. 39 Da cana Tadi nae
mimilelajai po etaezo eaniji ajai masha po biyo
anibojae. Apamo dohuodi didiaiboani tsio,
doeteocata ani metse pojae. 40 Da canaja tata
mahue poana po mama cana ai mahue poi melelajai.
Tadicatapo nae amimitsono peisha po canaja da
abeibei poi noshi bame paata pojo. Tadicatapoa
da cana tsanedeaa masha paata.



*Tadicatapo poi
diñelo titani epo po biyo*

41 Tsio Tata Jesoso ecuicha canaja Tadicatapo poi diñelo tilelajai po batadao eanibo. Apamo canaja diñelo titani po shamaniatani. Apamo ai tipao po canaja diñelo apamo lobiahuiquitani, eba. 42 Tsio ai mahue po mama, tata mahue poana po cuaiñaibo. Diñelo betacata maailipi lobiahuiqui ea. 43 Da baibotso, Jesosoa hua boanai cana dipa cuaetaiqui:

--Tanibime.

Daehuecata ya micana cuaesani, joda ai mahue po mamaja apamo masha lobiahuiqui. Jepea naedajamo betalipi lobiahuiquitani ea. 44 Da canajamo ize epo po diñelo beta pehue titani. Huada bale ai mahue bime dipa hua diñelo micata eahuiqui.



Capitolo 13

Becata dia poani po cana biyo

1 Tadicatapoa etaecata pejuhuelel poe neti huetianaiboanio boanaiya Jesosoa dipa ea:

--Bahuicuaeiji, joda Tadicatapoa etaecata cana ji quia atsa lacua. Majana cana ajaicata po metse tata canaja ea.

2 Jesosoa cuaetaiqui:

--Damo, joda etae cana ajaicata po bajaidya aque. Becata cuaiñaibotso atapea po canaja, joda pataesapetaibo. Majana pehue loloaneti papoibo.

3 Dipa potso Tata Jesoso, boanai cana nae eohua shocue beneje poti. Olibo poneti po, Tadicatapoa etae batadao po eohua shocue beneje poti. Jesoso jodo eani tsio, tata Pedeloa, Jacoboa, Joanaja, Adesea dipa tsibicuaeabajati pome epo:

4 --Cuama cuaeiboque, midya Tadicatapoa etae biyo ecuae po cana, ¿quetsio dipa poiboani? ¿Cuipa ai bani tsio dipa poiboani bamehue cuama?

5 Jesosoa cuaetaiqui:

--Do nimemehue mepoque, aiyaja micana diloa pimehuiquima paata pojo. 6 Apamo cana becata netiatani, dipa mimime poatani, "Emamo da Quilito". Da shili canaja apamo cana diloa pamehuiquitaibo. 7 Dahuehue po ecuicha cana

peaja ja-isheisheti poanio tsabajani tsio, aocuepi neti po cana peaja ja-isheisheti poani po biyo tsabajani tsio, aqueoli poi pipoma potame sahua. Dipa paaibo bale datsio daocua cuahue maesa popehiqui pipoma. 8 Tsejono pea tsejono pea peaja ja-isheti paati. Tsejono pea po neti metse po dipahue isha po nae peaja ja-isheti papo. Ehuamo dya jodo lialia, dya jodo lialia papo. Ai padia ezae po tsaai papo. Dipa poani tsio bale anecata po tseñe cana ponetiquiboani pehue. 9 Jabatijaidya potame sahua. Naedaja micana neti metse po cana patimehiquitaibo. Tadicatapo nae mimilelajai po etae meo naedaja micana pacuisolijitaibo. Micanaja cuichacata po cana, neti metse po cana botseo paneti, ema metse jabatitso pojo, ema biyo pacuaeti ezae. 10 Ehuio bale, eohua maesa pipomahue tsio, ecuicha canaja Tadicatapoa ecuae po cana ajailacua po pacuaehuiquipeibo, tsejono pea cana daocua cuajahue da patsabajapetaibo pojo. 11 Naedaja micana jeotaiboani tsio, timetaiboani tsio, cuichacata poa topoti topoti paataibo pojo, ai cuaeiboani po biyo queoli pojae pipoma potame sahua. Tadicatapoa datsio cuaetaiboani po cana pehue shipa cuaehuiquiboque. Midyahue mimiboani pipoma. Tadicatapoa shamaja bale pamimiquiaibo bale. 12 Datsio tata canaja huada mamazao

pohue tidyeahuiquiboani eatani, naedaja joda pamanoemetaibo pojo. Tadi canaja huada bacua bime timehuiquiboani pamanoemetaibo pojo. E Zoe canaja huada huadi pohue, tadi pohue tidyeahuiquiboani eatani, pamanoemetaibo pojo.

13 Micana ema metse batso, naedaja daocua cuajahue micana nae adojocata papoibo. Ema tsi-a ahueya pipoma po cana bale Tadicatapoa ize mejanahuati lacua paataibo.

*Diabolo metse po
ai shili cata po biyo*

14 'Dipa poani bamehue atso bale, quima jilica baninia po cana. Tata Danielia tsonoda neti epo poa, ai shili cata po diaboloa metse po biyo cuaeme atana. Jodea eohua neti po canaja joda ai shili cata po Tadicatapoa etaezo baiboanio, hua jododona, eohua shocue cana beneje pohuiquitso bale. 15 Etae tsecueo eani po tata, hua ai huale cana pajemi ezae, etae pinobima potso bale. Hua poti pehue. 16 Tejeo poja po tata jaibai pajeti ezae, hua etae pibanatima atso bale. 17 Da nedacata cueme tseiñe cana poiboani tsio, e Zoe badei po mama cana, e Zoe sosoaiji po mama cana tsa bata quia polipi poani. 18 Tadicatapo bicuaebajatso bale, dipa poani tsio aboacata pipoma papo pojo. 19 Datsio nedacata cueme tseiñe bame poani.

Tadicatapoa daocua cuahue ai eimeata tsio beo
 tsio dipa po batahue pibama isha epo. Becata
 dipahue pibama isha poani. Datsio pehue dipa
 epo poani. 20 Da nedacata cueme tseiñe apamo
 pojomo, ai se ize poani pipoma. Huada poi
 baibai po cana poi bale, Tadicatapoa da anecata
 po tseiñe cana apamo pipoma meataiboani.

*Jesoso noahue isha eohuao nojoibo
 isha po biyo*

21 'Ai tataja midya: "Baiboque, jidyó
 Quilito neti" cuaeme ataomo, daehue bamehue
 piama aque. "Jomo Quilito eani," cuaeme ataomo,
 boanajae piama aque. 22 Quilito noshi po cana,
 Tadicatapoa jejeme cuaeiji po noshi tata cana
 eani papo. Da canaja ai nimetiobai po cana
 paataibo, Tadicatapoa poi lacua po cana
 padiloemeibo ezae. 23 Do nimemehue mepoque.
 Dipa piamahue tsio tso ya micana da cana biyo
 cuaepesaiqui. 24 Datsio, ecuicha cana
 anetseiñe popeanio, zeti apotanaibo, badi maeda
 pipoma poibo. 25 Tohuai cana datsio baepa
 cuichae olotibo. Baepao neti po ajoji po cana
 tsatsatsa papoibo. 26 Tsio ecuicha canaja ema
 mozizi bade po midyójoe pobeani pabata.
 Jajojicatatitso pobeibome papo. Ajaicata lacua
 pehue pobeame poani. 27 Datsio yama
 Tadicatapoa eiloi shama cana pa-ilohuiquibo,

quia poi baibaibe po ecuicha cana jemiquipeibo paataibo pojo. Daocuahue eohua cuichae joda cana pajemiquipetaibo. 28 Acuitsa cana micanaja boanaijime. Boisi pisha poanio, mala tsaja poani micanaja bamehue. 29 Da batahue isha, ya micana cuaesaiqui po cana dipa poani bani tsio, ema eohuao etsia cuaiñaiboani micanaja bamehue paa. 30 Daehuecata cuaesani ya micana, dyatsio neti po cana pimanoibomahue tsio daocua dipa papo. 31 Baepa canamo, eohuamo, ai canamo, daocua cuahue maesa papo. Quia ecuae po cana bale maesa poi pipoma.

Quetsio Jesoso nojoibo isha po biyo

32 'Quetsio ema nojoibo isha po bale aiyaja dipa bamehue pipoma. Tadicatapoa eiloi shama canaja, Tadicatapoa leleo neti po dipa bamehue pipoma. Yama, hua bacue dea, dipahue. Tadicatapoamo pehue quetsio dipa poiboani po biyo bamehue. 33 Jabatijaidya pomane, quetsio ema nojoibo isha micanaja bamehue pipoma batso. 34 Ema aocuepi noatiboani po tata batahue. Pojaichapeiboani tsio, joda tataja hua eiloi cana dipa cuaeme aibo: "Noatihue da ema poani. Daocua quima metse po cana micana metse popasiboani. Miqueda polelajai po modo meaque." Tsecue tomoi bajaidya meahuodi po eiloi huada dipa cuaeme aibo, "Toabajaidya aque". Poibotso

pojaenaibo. 35 Bea quetsio DOJOI pobeibo.
 Eaponani tsio ja. Sisa doeteocata ja. Hualipa
 cueibohuodi polelajai tsio ja. Sisaehue ja.
 Bea quetsio batso bajaidya ahuodi. Micana, quia
 eiloi cana, da batahue isha meaque. Quetsio ema
 nojoibo bamehue pipoma batso, bajaidya meaque.
 36, 37 Ema ai nimetsio cuaiñaibo batso,
 bajaidya meaque, micana tahuhi bishapo pehue yama
 bacuaiñaibo piama paa pojo. Ya micana
 cuaesaiboani po cana yama ecuicha cana daocua
 cuahue cuaesaiboani, jabatijaidya potame sahua.

Capitolo 14

*Jepe canaja Jesoso isheanaibotso
 bale cata batini epo po biyo*

1 Tseiñe betacata potso tseiñe peisha po
 cana poiboani. Tsonoda bepoa Tadicatapoa Isaeli
 canaja todi esi masha po piishema, ba-ejeanahue
 a bishapo pehue. Joda tseiñeo panimebaibo isha
 ezae, peada tseiñe, ba-ejeanahue po tseiñe
 banime eatani alelajai. Da shipa siete tseiñe,
 laba jadotsoatibai mahue po tseiñe cana banime
 eatani alelajai. Bale cuichacata po Tadicatapo
 nae mimiji poi po canaja, ai izedeameiji canaja
 Jesoso isheanaibotso bale cata batini.

--¿Cuipa atso bale ja tsiiñaibo a?
 pa-isheibo ezae, --jacuaetime pohnodi--.

2 Bale apamo ecuicha cana jidy dohuodi tsio, ba-ejeanahue po tseife cana ezae, piishema atso bale. Datsio joda isheibo pojomo, ecuicha cana apamo jazaeyazaeyati poiboani ja.

Mama Maliaja Jesoso eidyoi ea po biyo

3 Betania leleo, Jesoso tata Simonoa etaezo eani epo. Biqiu ihuicuaifajacata epo



po tata Simono epo. Didiaiboani tsio, mama jodo cuaiñaibo. Mato nadona mei po dojotaiyoa epo. Joda ena bale aihuime po, diñelo bicuiziacata poi po. Da metse manoiboani po cuicha pepahuiquibohuodi alelajai. Huada mato, talale mahue batso, nalao tsabihuiquitaiqui, ena pazoya ezae. Jesoso shoa biyo zoya ea.

4 Jepe jodo eani po canaja bale:

--Te. ¿Cuipa batso da nadona lacua pohue topahue poi pehue? 5 Shipa cuaebajadeatso bale, diñelo apamo pamejemi ezae. Ai mahue po cana da diñelo tidyeahuiquitso bale. --Dipa cuaeti cuaeti atso, da canaja da mama tsaneme ea.

6 Bale tata Jesosoa cuaetaiqui:

--Cuipa piama meaque. ¿Cuipa bame eani micanaja? Huada ema ata po ajailacua yama bani. 7 Ai mahue po cana dipa pohue neticha. Quetsio dipa aibojae tsio, da cana ai tibo poihue. Ema bale dipa pohue micana dojojo neti pipoma. 8 Huada ai aibotoa po tso ataiqui. Ema pimanomahue tsio idyoitaiqui. 9 Daehuecata cuaesani ya micana, cocuata ja tsedapo canaja ema biyo cuaebaletaneti paataibo, huada ata po biyo dipahue cuaetaneti paata.

Tata Jodasa shili po biyo

10 Tsio tata Jodasa Icaliote, boanaicata po noshi, cuichacata po mimiji poi po cana banatibo ea, cuipatso Jesoso timehuiquibome a paaibo ezae shili. 11 Da canaja dipa tsabajatso nime ajai epo:

--Cuamaja midya diñelo patibo --ea.

Dipa atao tata Jodasa, quetsio bale ja Jesoso tibome a, nimebatani epo.

*Ba-ejeanahue po
tseiñeo po biyo*

12 Datsio laba jadotsoatibai mahue po dilelajai po tseiñe cana potsaneiboani epo. Da tseiñeo ba-ejeanahue poi po obeja zoe Tadicatapoa poi ishelelajai. Dipa batso Jesosoa boanai canaja Jesoso bicuaebajataiqui:

--¿Jicotso cuama poti ba-ejeanahue po tseiñeo dilelajai po cana ajaichaibo paa ezae? midya padia pojo.

13 Huada boanai detse cuaetaiqui:

--Leleo potiboque. Jodo tataja, mato momoibo po dojotaiyoa po tsopahuaiboani. Da mebocueiboque. 14 Da nobiboani pojojo, joda neti metse po tata cuaeiboque, "Ai Bahuicuaeijia midya dipa bicuaebajatame eatani, '¿Cotso didia lele? yama quia boanai cana nae jodo

ba-ejeanhue po cana padibo ezae'." 15 Dipa cuaeibojo, huada metseda bacueo po didia lele pacuaetaibo. Da ajalili, ai cana metse, metseada pabajajobo. Jodo ai cana padibo ezae poi po ajaichaiboque cuadaja poi.



16 Boanai detse lele beneje poti.

Cuaiñatibotso didia lele, Jesosa cuaeme ataiqu batahue po tejetibo ea. Ba-ejeanhue po tseiñe dilelajai po cana ajaichapeibo ea. 17 Eaponar tsio, Jesoso, boanai dose po nae jodo cuaiñaibc

*Timehuiquihue shili po
tso ai se ja po biyo*

18 Daocua didianinia tsio, Jesosoa dipa
ea:

--Cuaesani ya micana, behuehue eani po
tataja, ema najo didiani poa, ema timehuiquihue
shili poi paataibo.

19 Da tsabajatso bale boanai cana amosone
poanaibo. Tsio dya peada, dya peada, dya peada
dipa bicuaebajame ea:

--¿Ema quepotso? ¿Ema quepotso?

20 Huada cuaetaiqui:

--Boanai dose po, da peadahue bime, ema nae
laba da jotohuajaohuodi zimiatani po tata, da
bale. 21 Ema, tata poi po, da tsaai poetibahue
po batahue papo. Tadicatapoa jilica cuichao,
ema biyo zehuipetana po batahuecata papoibo.
Ema timehuiquihue shili eatani po tata bale
atsacata poi pehue poiboani. Joda jaidyaohue
pipoma potso bale ajai masha joda poi mo.

Tata Jesosoa ami, emi po biyo

22 Didiani tsio, Jesosoa laba jemiquitsoa.
Tadicatapo: --Calasia --cuaetso, laba
pezoiquitso--, ma, ma, ma --eape--. Jemique.
Ojo quima emi --ea.

23 Tsio huada tasa eiziji jemiquibo.



--Calasia --atso jepe cana tidyea isha.
Huada maai izi. Huada maai izi eape.

24 Dipa eani tsio huada dipa cuaeme ea:
--Ojo quima ami. Joda zoyameiboani,
Tadicatapoa ecuae po shacua po daehuecata micana
bamehue paa pojo. Joda zoyameiboani, tsedapo
canaja masahue ea po cana epo po cana

pasipahuiquibo ezae. 25 Cuaesaiboani ya micana, joda jono jaja ena yama jidy eohua izibo isha pipoma poani. Tadicatapo eatanohuecata pojojo cuaiñatibotso dada bale shacua lacua po pa-izibo.

26 Jejei peada aibotso huetianaibo. Olibo eohua shocue beneje ponaibo.

Boanai cana becata jepetianaiboani po biyo

27 Tsio Jesosoa dipa cuaeme ea:

--Temasha, sisae micana daocua cuajahue mosojozei jabatitso ema meiyahuiquipeiboani. Tadicatapoa tsonoda bepoa dipa cuaeme ea, "Obeja biabai po tata yama pa-isheibo. Dipa ya aibojo obeja cana jepetianapeibo."

28 Tsio Jesosoa shipa mimidea:

--Peisha po canaja ema manoemeibo. Dipa ataibojo, micana jepetianapeibo. Bale noahue isha eizeneti metaibojo, ema ehui Calilea eohua papotibo, micana ema tia papo.

29 Tata Pedeloa joda cuaetaiqui:

--Jepeamo midya meiyaibo bime dipa, yamamo mi pimeiyaiboma poani.

30 Jesosoa cuaetaiqui:

--Cuaesani ya mi, temashahuemo, sisae, hualipa cuei betacata pipomahue tsio, ema biyo midya mimiboani noshi quimisha papo. "Jm, bea ai se pehue," midya paa.

31 Pedeloa bale jado-ejecatatitso ecuae:

--Tata canaja ema midya nae eisheiboani
pohue dipa emamo dipa mimibome pipoma.

Boanai cana daocua cuajahue dipahuodicata
ea.

Jesoso tecata batini po biyo

32 Dipa potso Jesoso, boanai cana nae
olibo acui poneti po dojojo cuaiñaibo.
Jetsemani banime epo. Jesosoa hua boanai cana
cuaetaiqui:

--Jidy animane, ema Tadicatapo nae
mimiboani tsio.

33 Tsio huada tata Pedelo, Jacobo, Joana
shipalimi dojota. Dipa atso joda tecata batini
poanaibo. 34 Huada cuaetaiqui:

--Ema amosonecata po poi manoibotso bale
cata batini. Jidy meanique. Bajaidya atso hale.



35 Jesoso shipalimi jadeatibo. Eohuao zotoja potso, Tadicatapo nae mimibo, da belicata ane po cana dia poibo po po-ejeibohue pehue potoa quepotso paba ezae. 36 Huada dipa cuaeme ea:

--Tadi shodi quia, midya dipa daocua cuahue dipa ai aibotoa. Da belicata ane po cana dia poibo po peyoemehuiquiboque. Bale yama ajae eani po piama aque. Midyahue ajae eani po bale aiboque. 37 Dipa atso, tata Pedelo, Jacobo, Joana eani pojojo cuaiñaibo isha. Daocua tahuichaninia epo. Izemehuiquibotso, huada tata Pedelo bicuaebajataiqui:

--¿Simono, tahui sha midya? ¿Peadahue ola bajaidya atoa pipoma sha mi? 38 Jabatijaidya potso bale, Tadicatapo nae mimitso bale, masahue piama papo ezae, Satanasa shili masahue mepotia piama paata pojo. Nimejono metsemo "paa ya samo cuichiji". Emiamo mipai da mae ahuiquihuodi, bale.

39 Dipa atso, Jesoso shipalimi jadeatibo isha, Tadi nae pamimibo isha ezae. Cuaesaiqui po cana noahue isha cuaeibo isha ea. 40 Boanai canaja quimisha eani pojojo cuaiñaibo isha tso da cana tahuichaninia isha eba, etoa biqui ajasha pojo. Da canaja bale ai picuaema, aitso cuaeibotso ajai bamehue pipoma batso.

41 Cuaiñaibo quimisha potso huada cuaeiqui:

--¿Tahuijæ pehue sha micana? Poeti.

Tataja, ema, tata poi po, masahue ahuodi po cana
timehuiquihue shili eataiboani beo.

42 Menetianapeiboque. Cuada beo. Bahuiquique.
Timehuiquihue shili o po shopi.

Tata canaja Jesoso eiñataiboani epo po biyo

43 Datsiohucata, dipa mimiboani
mepaihucata tata Jodasa, boanai dose po canahue
da peadahue isha bime jodo cuaiñaibo. Apamo
tata canaja cuishilo cana nae, soe cana nae tata



Jodasa bocuetani ea. Cuichacata po mimiji poi po canaja, ai izedeameiji canaja, esi cuichacata po canaja ilohuiquitao, pobeá. 44 Jodo picuaiñaibomahue tsio, tata Jodasaja naeda cuaetaiqui:

--Yama bojebeiboani po tata da iñaiboque, da donaibojaidya aque.

45 Cuaifñaiboani tsiohuecata tata Jodasa Jesoso pejuhuecata netibo.



--Dojoicatapo quia mi --atso, huada
 Jesoso bojebeibo ea. 46 Atao, naedaja Jesoso
 eifñaibo. 47 Bale, jodo neti po tataja cuishilo
 metse mimiji cuichacatapoa eiloiya eizaja seo.
 48 Tsio Tata Jesoso da cana bicuaebajataiqui:

--¿Ema jatsijitiji po tata bamehuodi batso
 sha pobeaa? cuishilo nae, soe nae, ema pa-iñaibo
 ezae, pajeobo ezae. 49 Jm. Yama Tadicatapoa
 etaezo, micana nae, izedeamenetihuodi tsio,
 micanaja ema piiñama bale. Bale Tadicatapoa
 micana eani po biyo pitsada mahue. Da biyo hua
 jilica cuichao tso zehuiPETANA.

50 Tsio Tata Jesosoa boanai cana daocua
 cuajahue Jesoso meiyahuiquitso
 tsaetsaezapetianaibo. 51 Huaezacua po bale
 tia poyoa, masha pezoihue pehue jaibatani. Tata
 betaja huada mashaohue iñataiqui. 52 Bale
 mashae neti poanaibotso, joda cuichahue
 jododonaibo.

Jesoso biyo cuaeni noshi epo po biyo

53 Tsio tata canaja Jesoso bai iñanaibo.
 Mimiji cuichacatapoa etaezo cuaiñatibo. Daocua
 cuahue cuichacata po mimiji cana, esi cana, ai
 izedeameiji cana dohue isha cuaiñatiboani epo.
 54 Tata Pedelo mipa bamecata poyoatso, mimiji
 cuichacatapoa etae tsecueo cuaiñatibo. Biabai
 po cana najo cuati pejo eiyoniatini epo.



55 Datsio cuichacata po mimiji poi canaja,
 peisha po cuichacata po canaja tata cana
 tsatani epo, "Tata Jesosoa masahue ea" cuaeme
 paata pojo. Dipa tsabajajaibotso, da biyo
 Jesoso pamanoemeibo ezae. Bale tata betacata,
 dipahuecata isha cuaeme eatani po pitejetima.
 56 Apamo canaja Jesoso biyo cuaeme eani noshi
 bale betacata tataja dipahuecata isha cuaeme

eani pipoma. 57 Jepea, netianaibotso, dipa
cuaeni noshi ea:

58 --Cuamaja tata Jesoso dipa tsabajaja:
"Yama Tadicatapoa etaecata, tata canaja ea po,
pataesataesahuiquibo. Quimisha tseiñe potso
yama peisha po paapeibo, tata canaja piama po."

59 Bale da canaja dipahuecata isha cuaeme
eatani pipoma dipahue. 60 Tsio mimiji
cuichacata po, tata cana doeteocata netianaibo.



Huada Jesoso bicuaebajaibo:

--¿Ai cuaeibojae mahue sha? ¿Joda canaja midya biyo aitso cuaeme eatani?

61 Tata Jesoso bale tsiñeti pehue. Ai picuaema pehue. Noahue isha Tadicatapo nae mimiji cuichacata poa bicuaebajataiqui:

--¿Midya Quilito, Ajaicata poa bacue dea quepotso?

62 Jesosoa cuaetaiqui:

--Dipahue ema. Ema Tadi ajojicata po pejo eani micanaja pabaibo. Ema mozizi po midyojohue pobeiboani micanaja baibo poani.

63 Dipa tsabajatso, mimiji cuichacata poa hua apo jaibai jazaiquitso lemahuiquitaiqui.

--¿Joda biyo cuada pamoda tsabajaibojae quepotso? Mi. 64 Huada cuaeta po cana shili micanaja tsabajaiqui. "Tadicatapoa bacue dea" pa bame ea shili. ¿Cuipa atso ajai nimebani micanaja?

Daocua cuahue mimipe:

--Da manoemeibotso bale --epo shili.

65 Jepe datsio Jesoso cuichao cuedihuiquitaiqui. Hua ebo ai metse diloibotso, cuelijihuiquibo. Dipa atso dipa bicuaebajame ea:

--¿Queatso mi cuelijitaiqui?

Biabai po canaja dipahue cuelijitani ea.

*Pedeloa "Jesoso bea ai se ja pehue"
eatani noshi epo po biyo*

66 Tata Pedelo zeibadeo eani tsio, mimiji cuichacata poa eiloi po mama do cuaiñaibo.

67 Tata Pedelo eiyoniatini baneti.

Shamanetibotso, mimitaiqui:

--Midya dipahue Nazale po tata, Tata Jesoso bocuei polelajai po.

68 Tata Pedeloa bale cuaetaiqui:

--Ai ja dia eatanicata pehue yama midya. Dipa noshi.

Dipa atso etae huelei tsecueanaiyo poti. Tsio hualipa ecuai cueibo. 69 Eiloi po mamaja Pedelo noahue isha banetitso pejohue po cana cuaetaiqui:

--Joda tata Jesosoa bocuei.

70 Bale Pedeloa noahue isha dipa noshi cuaeibome ea isha. Atsonolimi potsso pejohue po canaja tata Pedelo cuaetaiqui:

--Daehuecata midya huada bocuei polelajai, midya Calilea eohuao po tata batso pojo.

71 Bale huada dipa ecuae:

--Ema daehuecata pipoma pojomo, Tadicatapoa ema ishetso bale. Daehuecata cuaesani ya micana, micana mimihuodi pojojo po bea ai se ja pehue.

72 Huada dipa eataniohucata hualipa ecuai noahue isha cueibo isha. Da tsabajatso, tata Pedeloa tata Jesosoa ecuae po nimebaibo isha:

"Hualipi ecuai cuei betacata pipomahue tsio, midya ema biyo mimibo quimisha noshi papo." Tata Jesosa dipa cuaeme asata po nimebani tsio tata Pedelo patsaneibo.

Capitolo 15

*Jesoso jodio cana eilotaniohue po tata,
tata Pilato najo epo po biyo*

1 Sisaehue dada cuichacata po mimiji cana, esi cuichacata po cana, ai izedeameiji cana, peisha po peasocata po cana dohuodi poibotso, jacuaecuaezati epo. Dipa potso, joda canaja



Jesoso eijimeibotsohue donashahuiñaibo, tata Pilato patihuiqui ezae. 2 Tata Pilato bicuaebajata:

--¿Midya jodio canaja neti metse po tata quepotso?

Jesosoa cuaetaiqui:

--Midya cuaesani po batahue emamo.

3 Dipa potso cuichacata po mimiji canaja cuaepeta apamo Tata Jesosoa masahue ea po cana biyo. Dipa noshi. 4 Datsio tata Pilatoa noahue isha Jesoso bicuaebajataiqui:

--¿Da biyo ai cuaeibotoa quepotso? Tsabajaque. Da canaja midya "masahuehuehuodi" ataiqui.

5 Tata Jesosoa bale shipa mimideati pipoma. Dipa batso tata Pilato nimetioba ea.

*Masahue ea po,
tata Bashabasa biyo po*

6 Ba-ejeanahue po tseiño cana poani tsio, tata Pilatoa izia mahue easha po tata, masahue ea po, huetianamehuiquibo alelajai. Ai se naedaja bicuaebajatani po huetiana mehuiquibolelajai. 7 Datsio tata cana apamo izia mahue etaezo eani epo, cuichacata po cana nae peaja ja-isheti poani batso, apamo ecuicha cana manoemeta batso. Dohue eani po cana nae tata Bashabasa epo. 8 Dipa batso tamomoneti po

ecuicha cana tata Pilato najo cuaiñaibo. Da canaja cuaeta:

--Alelajai po batahue aiboque isha dyatsio. Izia mahue easha po tata peadahue zeibadeo pehue mehuiquiboque.

9 Huada bicuaebajataiqui:

--¿Yama jodio canaja neti metse po, tata Jesoso bocahuiquibotsomo tso quejai?

10 Cuichacata po mimiji canaja Jesoso biyo nimeisitiana epo jepea Jesoso ajaicata bani batso. Dipa bamehue batso tata Pilatoa dipa bicuaebajata: "¿Tata Jesoso bocahuiquibotsomo tso quejai?"

11 Cuichacata po mimiji canaja bale tamomoneti po cana dipa mepotia ea:

--Tata Bashabasa bale ajai, cuamajamo. Tata Bashabasa zeibadeo ahuiquitso bale.

12 Pilatoa noahue isha bicuaebajataiqui:

--¿Dipa aibotsomo, "jodio canaja neti metse po tata" metse cuipa bale yama aibo? ¿Tata Jesoso metse cuipa bale yama aibo?

13 Dipa atao, da canaja bicuiziacata zaiyahuiquime ea:

--Acui ticaloe cuichao tatameiboque.

14 Tata Pilatoa bicuaebajataiqui:

--¿Cuipa pojo dipa? ¿Ai masahue po tso ata?

Naedaja bale bicuiziacata masha ea:

--Acui ticaloe cuichao tatameiboque mae.

15 Dipa batso, tata Pilatoa tamomoiji po cana nime ajai aibojae batso, tata Bashabasa zeibadeo pojaemehuiquitaiqui. Huada tata Jesoso cuisolimeibotso, biabahuodi po tata cana timehuiqui ea, acui ticaloe cuichao patatataibo




pojo. 16 Datsio biabahuodi po canaja Jesoso shipalimi eiñataiyoa tata Pilatoa etaezo. Jepe biabahuodi po cana cuaemehuiqui ea. Joda cana jodo cuaiñaibotso, 17 jaibai asele po, cuichacatapoa jaibalelajai batahue po metse Jesoso jaibametaiqui. Mati cuiza batahue po jono, cuanonoatso, hua eshao jozoamehuiqui. 18 Dipa atso da canaja Jesoso iyoda poi noshi cuaeme eatani:

--Midya cuichai aatajai bani. Jodio canaja neti metse po tata lacua midyamo.

19 Tsio etsa batahue po metse shoacuisolihuodi ea. Joda cuichao cuedianiahuodi. Joda botseo zotoja pojaiña, iyoda bani noshi paa ezae.

*Jesoso acui ticaloe cuichao
tatameibo ea po biyo*

20 Dipa jichome atso, jaibai asele po bocahuiquibo. Hua apohue jaibai jaibameibo isha. Dipa atso joda eiñanobiquibo, acui ticaloe cuichao patataibo ezae. 21 Datsio tata Simono, Sileno eohua netilelajai po jodo cuaiñaiboani epo. Joda, tata Alejadoa, tata Lopoa tadi epo. Joda tata Simono biabahuodi po canaja dipa cuaeme ea:



--Joma acui ticaloe po mapaiboque.

Dipa cuaetaibojo huada mapashahuiñaibo.


22 Tsio da canaja Jesoso eñataiyoacuaifña
Cocota leleo. Shoatsoa lele dipa. 23 Naedaja
jono jaja ena, madi apatse po metse hualo po,
tibaibo, huada pa-izita pojo. Huada bale da
pijemiquima. 24 Datsio da biabai po canaja
Jesoso acui ticaloe cuichao tataibo.
Tatapetaibotso, Jesosoa jaibai cana biyo topahua
bishapo pehue eatani, aiyaja tso Jesosoa
jaibai cana jemiboani paba ezae. 25 Jesoso
tatataibo tsio, zeti mo eapaocata bepoa epo.
26 Cui pa bame eani Jesoso tso manoemeibo ea

naedaja bamehue paata pojo, da canaja jodo dipa zehuihuiquime ea:

--Jodio canaja neti metse po tata.

27 Biabai po canaja datsio jatsijitiji po tata detse dipahue acui pejo po cuichao tatataiqui. Peada Jesosoa zania beneje, peada Jesoso me enai beneje tatanetime ea.

28 Tadicatapoa tsonoda bepoa zehuita po cana da tseifeo daehuecata poi tso ea. Tata Jesoso masahue alelajai po cana batahue, ecuicha canaja batani ea. 29 Jodo bashanaiboani po



canaja Jesoso dipa jichome eatani ea:

--Ji baque. ¿Tadicatapoa etae taesaibotso quimisha tseifne noahue isha aibo isha sha?

30 Jm. Midya dipa aibotoa potsomo, jo pehue ajai aibotso bale. Poboteiboque.

31 Cuichacata po mimiji canaja, ai izedeameiji cana nae, dipa jichome eatani ea:

--Huada peisha po cana atsahualelajai.

Bale jo pehue jaatsahuati po apitsa.

32 Quilito Isaeli canaja neti metse po acui cuichae poboteibotso bale. Huada dipa poiboani baibotso cuada joda tsi-a.

Masahue po tata detse, Jesoso nae tataneti po detsea dipahue Jesoso masa batani ea.

*Tata Jesoso
acui ticaloe cuichao tsio
epo po cana*

33 Joda tseifne, tseifne doeteocata bime, sisa doeteo poi cata batahue poanaibo. Quimisha ola tso noa aapocata poanati. 34 Zeti ohue shodicata tsio, Jesosoa hua mimi metse bicuiziacata jejeme eibo:

--¿Eloi, Eloi lama sabajani? "Tadi quia, Tadi quia, ¿Japotso ema mi meiyaiboani?" dipa.

35 Da tsabajatso, jepe jodo neti po cana dipa mimime epo:

--Jm. Tsabajaque. Huada babashodi Eliasa jejetani.

Tsaba isi atso, dipa mimime epo.

36 Peada jododotitso, izi jajona po epoja meo meiyetso, pobeibo. Etsa batahue po metse da eiloatsoa, Jesosoa pa-izita pojo. Dipa iloatsoatso dipa mimi:

--Cuada jidyó izoalbo, tata Eliasa pobeá, joda padoboteibo ezae quepotso paba ezae.

37 Tsio Jesoso bicuiziacata tsitsi aibome potsohue pijanamiquiboma. 38 Datsio, Tadicatapoa etaezo bade po penei, masha apamotiji po, lemamehuiquipeibo ea. Huizaboto beneje lematsaneibotso tsaja beneje huaca ea. 39 Jesoso janamiquihueya baibotso, dahuehue neti po biabai po cuichacata po dipa mimime epo:

--Nae sha daehue, joma Tadicatapoa bacue dea epo.

40 Mama canaja aocuelimi shamataneti epo. Mama Malia, Madala leleme po da cana najo dipahue epo. Mama Salome peada, mama Malia peada, jodamo tata Jacoboa, ezoe masha poa, tata Josea huadi epo. 41 Tata Jesoso Calilea eohuao poiboani tsio, joda mama canaja Jesoso bocue po, huada poi jana mea po. Dipahue isha, apamo Jesoso nae Jelosalene cuaifiaiboani po mama canaja jodo shamataneti epo.

Tata Josea Jesoso doboteiboani ea po biyo

42, 43 Dipahue, tata Jose, Alimatea leleme po jodo neti epo. Huada leleo huada ame eataniohue. Huada Tadicatapoa eilometaniohuecata poibo poi po tseiñe eizoatani epo. Tsio, zeti ohue shodicata epo. Hueno janahuaibolelajai tseiñe poiiboani batso, da tseiñeo ajaichaibolelajai po tseiñe epo. Dipa batso pojo tata Jose, mosojo tadatso, tata Pilato banatibo. Cuaiñatibotso, dipa bicuaebajaibome ea:

--Tata Jesosoa cuicha yama jemibotso baleatso ¿tso quejai?

44 Tata Jesoso manopodaiqui tsabajaibotso, tata Pilatoa nimetiobatani ea. Eiloi ilohuiquibo, biabai cuichacata po pajeticaibo pojo. Biabai po cuaiñaibojo, tata Pilatoa dipa bicuaebajaibome ea:

--Tata Jesoso ¿tso manopodanaiquiba sha?

45 --Tso manoetiba --biabai poa cuaeta.

Dipa ataibojo, Pilatoa Jose cuaeibo:

--Cuicha jemiboque.

46 Dipa atao, tata Josea masha ajaicata po, amae po, cuaebajaibo. Tata Jesosoa cuicha doboteibotso, masha metse panashaibo. Dipa atso, huada Jesoso talaleo lobiahuiquibo ea. Tata canaja ea po majana shocue talaleo lobiahuiqui. Da batahue po talaleo mano epo



po lobiahuiquihuodi alelajai da canaja.
 Lobiahuiquibotso, majana ajalili tocuicuibotso,
 da metse tsecue tomoiquibo ea. 47 Mama Malia,
 Madala leleme po, mama Malia, tata Jacoboa,
 tata Josea huadi, huatseada Jesosoa cuicha dohue
 eishasha eba.

Capitolo 16

*Jesoso noahue isha
 eizecuaiñaibo isha epo biyo*

1 Janahuaibolelajai po tseife poeti tsio,
 eaponani tsio, mama Malia detsea aihuime po

pepai cuaebajaibo, Jesosa cuicha pamepepanati ezae. 2 Hueno, acuishalipi poani tsio huatseda talale beneje pona. 3 Huatseada dipa cuaeme eatani:

--¿Aiyaja tso tsecue tomoi po majana tocuicuiahuiquibo?

4 Bahuiatsoatso huatseada majana tocuicuiatiana, eba, da ajalilicata pojo. 5 Talaleo nobini tsio, me enai beneje, Tadicatapoa eiloi shama, huezacua batahue batame po eani baneti. Jaibai da babahue po amae po jaibata eba. Huatseada nimetioba ea. 6 Huada bale huatseda cuaetaiqui:



--Piñimetiobama meaque. Metseada tata Jesoso, Nazaleo leleme po, tsani. Acui ticaloe cuichao tataeme po tsani. Tso noahue isha eizeneti. Jidyó pipoma. Naedaja hua cuicha talaleo ishata pojojo bahuiquique. 7 Bale meponaiboque. Hua boanai cana, tata Pedelo dipahue, dipa cuaeanatiboque: "Tata Jesoso ehuió Calilea eohuao ponaiboani. Jodo micanaja joda baiboani isha, huada cuame ata po batahue."

8 Huatseda, talale poeneti huetianaibotso, jododoshahuiñaibo, queolicata jabatitso, nimetiobani jabatitso. Ai se ai cuaeibo piama, queoli jabatitso.

*Jesoso noahue isha
naeda baemetaiboani ea po biyo*

9 Da tseifneó, domico tseifneó, sisaehue, noahue isha eizeneti poibotso, Jesoso ehuió mama Malia, Madala leleme po baemeibo ea. Joda mama Malia cuichao, huada siete jamasaemetiji po shama cana ilohuiquitana. 10 Huada Jesoso baibotso hua bocuei cana cuaeanatibo ea, da cana pataneti tsio. 11 Da canaja joda eizeneti tsabajatso, huada dipa bataiqui tsabajatso, dipa noshi bame easahua. 12 Dipa potso, bata pea poanaibotso, Jesosoa bocuei detse baemeibo, joda detse dizia poyoa


tsio. 13 Ponaibotso, huatseada boanai jepe
cuaetaiqui. Joda canaja bale da tsitsabaja
piama. 14 Becata, boanaicata po ose po (11)
dohuodi didianiatani tsio baemeibo ea.

Baemeibotso tsaneibo ea, tsi-a piama batso
pojo. Naedaja, "Jesoso noahue isha eizeneti
isha basani," cuaetaibojo, betsabani pehue
poani batso, tsaneibo ea.

15 Tsio Huada dipa cuaeme ea:


--Eohua idyada ponetique. Ema biyo po
ajaicata po cana daocua cuahue eimeape po
cana cuaebaleneti meaque. 16 Huidyimecuae
ea po, tsi-a eatani po cana ize janahuati
papotetaibo. Tsi-a piama po canamo bale
masahue poihue pehue Tadicatapoa pabataibo,
topotani tsio dada. 17 Tsi-a eatani po cana
dipa paaibo: "ema Jesosoa metse" eatani tsio,
jamasaemetiji po shama cana tsedapo cuichae
ilohuiquibo, jejeme shacua po metse mimibo,
18 nolili jemitsoatsomo, mojidya poi pipoma,
mahuai poi po cana izishatsomo, mojidya poi
pipoma, meatsa metse cuatataibojo, atsacata po
cana jaihue poibo. Tsi-a eataiboani po cana
dipa paa, tsedapo canaja dipa daehue bamehue
paata pojo.

19 Dojoicatapoa, hua boanai cana dipa
cuaeibome ataibojo, Tadicatapoa hua leleo
dotsoaemeibo. Atao Jesoso Tadicatapoa me enai



beneje eanibo. 20 Dipa potso hua boanai cana
jodae neti pojaenaibo. Eohua idyadae shipa
cuaedeahuodi ea. Tata Jesosoa atsahuahuodi
epo. Huada ai nimetiobai po cana ea, tsedapo
canaja joda cana Jesoso metse po cana daehuecata
poi bamehue paata pojo.

JESOSO POBALE
POJOJO PO EOHUA



AGRADECEMOS

a

**David C. Cook Foundation
Elgin, Illinois, E.U.A.
quienes nos han provisto con
los dibujos.**

